

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
APR 29 1940

16

T 3193/0.82

卷三十二

國書館珍藏印

新學傳發

明

太祖

洪武元年春至正二十八

春二月贛州衛指揮使

陸仲亨帥師會廖永安

在廣東

夏四月命陶安為

江西參政閏七月何真入朝授江西行省參政

豫章書

陶安傳云命安為江西行省參知政事諭曰江西上游地

撫綏莫如卿安辭不許其年卒於官

何真傳云真以廣東降奉詔入朝擢江西行省參知政事

安福志云元年永新冠劫殺邑大姓千戶俞茂勦之

是年四月

始置安福千戶所

二年已詔設屯田衛於贛州以指揮等官領之贛州舊志

江西通志

卷三十二 武事

四年辛亥秋七月贛州上猶山寇叛江淮行省中書左丞黃彬

討平之明書列傳

九年丙辰夏六月改江西行中書省為承宣布政使司傅維鱗

明書

十六年癸亥秋九月命申國公鄧鎮愈子臨江侯陳鏞德子濟寧侯

顧敬時子討永新龍泉山寇豫章書

十八年乙丑廣賊周三官謝仕真攻劫龍南信豐雩都等處破

其城焚掠甚衆至萬餘人明年統兵官尹和先用計擒賊二子乘勝督兵討平之贛州兵寇志

龍南紀事云周三官河源宦家子殺人亡命謝仕真以造

事發遂結黨倡亂

二十三年庚午春正月贛賊叛總兵東川侯胡海左右副總兵

普定侯陳桓靖寧侯葉昇討平之豫章書

葉昇傳云贛州山賊夏三復結湖廣峒蠻為寇昇為副將

軍同胡海等討平之俘獲萬七千人

陳仁錫世法錄云雩都知縣查允中奏近山賊夏三等作

亂袁州衛指揮蔣旺等領兵捕之旺乃擅發民丁三百人

驅之當賊方春之時且廢農業上曰以不教民戰是謂棄

之討賊武夫事何與于民命兵部遣人責旺亟罷其役

二十四年辛未夏五月捕誅分宜縣妖民明書本紀

建文帝元年己卯春二月戶部侍郎卓敬密請徙封燕王南昌

以絕禍本事竟寢明書列傳

四年壬午六月終夏五月燕王駐師江北帝下詔罪已遣使

徵勤王兵朱國標明鑑

革除錄云工部右侍郎張顯宗

福建寧化人洪武辛未榜眼

往江西招

集丁壯募民出粟太宗即位顯宗及江西布政使楊漣按察使房安僉事呂升等並為軍卒執告其罪釋不誅謫戍

興州

豫章書云六月江西肅政按察副使程本立聞靖難師入

京死之八月都督韓觀練兵江西甲子遣行人許子謨諭

廬陵縣民逃聚山林者丙子命都督陳暉指揮李忠叅贊

江西軍事戊子韓觀撫廬陵民復業十二月寧王權改封

南昌王

成祖永樂元年

癸未夏四月襄城伯李濬鎮守江西

豫章書

二年

甲申

春正月給事中朱肇撫安江西二月壬申命江西總

兵官李濬捕永新賊丙子命豐城侯李彬討永新賊戊子

永新賊陳繼成伏誅冬十一月論平永新賊功賞將士有

差

同上

李濬傳云永樂元年出鎮江西永新盜起捕誅其魁尋召

還卒

四年

丙戌

冬十二月安福叛賊朱務良及廣濟妖僧皆伏誅

明

書本紀

南安事考云九月征南大將軍成國公朱能副將軍新城

侯張輔出大庾嶺討安南國黎季犛檄南安所軍從征

五年

丁亥

夏四月置江西屯田僉事

豫章書

七年

己丑

春正月發江西兵征交趾秋九月妖賊李法良寇安

福僉事何穎督兵擒之法良伏誅

同上

按明書黃淮傳云帝北巡之明年長沙妖人李法良作

亂皇太子命豐城侯李彬討之漢王高煦忌太子有功阻彬師淮曰彬老將必能克賊願急遣彬卒擒法良據此則法良就擒伏誅其事當在八年而明書本紀亦載在七年故仍之

十一年癸巳春正月謫戍弩哈兒伯顏等於廣東廉州至贛州復叛伏誅同上

十九年辛丑夏四月勅尚書蹇義等二十六人巡行天下安撫軍民巡撫之名始此事畢則止未有定員時郭璉以工部侍郎安撫江西同上

宣宗宣德五年庚戌秋九月賈諒拜右副都御史偕錦衣指揮

王裕參議黃翰中官張義等巡視江西明書列傳

七年壬子會昌長河賊朱南鄭劉伯昂為閩粵江西三省巨寇

流劫邊鄙鄉勇李梅五獲其驍賊鄭與昂稍却退巢石背

三省會請征勦命東廠太監督軍屯於禾溪年餘無功乃

懸賞招勇敢士有武平人邱景崇者應募討賊贛州兵寇

志

九年甲寅秋八月江西叛民夏九旭等作亂尋伏誅明書本紀

魏源傳云永豐民夏九旭為亂帝以源江西人命撫之都

督任禮兵其後未至亂已平

陳本深傳云擢知吉安府與况鍾等同受勅十年三月樂

安大盜曾子良據大盤山眾萬餘本深設伏破之斬子良

英宗正統四年己未秋七月邱景崇以技術潛入賊營賊不疑

因率十一戶親族子弟五百人偽從賊與造軍器約官兵

為外援十二月晦日就筵間擒朱南鄭劉伯昂事平上聞

命以石背土田分賜十一戶世襲把總贛州兵寇志

十二年丁卯冬十月浙東葉宗留反寇鉛山等縣僉都御史張

楷討之廣信兵變志

鉛山志云先是正統七年浙江處州賊王能鄭祥四蒼大頭葉宗留聚眾千餘人入山盜礦十年掠永豐巡按會同都司調南昌衛廣鉛二所官軍及六縣民壯與王能等戰官軍被殺者甚眾永豐令鄧顥老人余斌入山招撫王能三十五人聽命給以劄付以永豐二十四都瘠荒地給與耕種充快手協同六縣民壯於永豐橫山頭設教場都司翁統集二所官軍以時操閱實所以鈐制之也王能既降計誘鄭祥四蒼大頭等三百餘人悉斬於永豐十五山獨宗留與部下遁去是年十月宗留聚眾盜掘處州少陽

坑歷雲和至政和之少亭皆無所得謂其徒曰與其聚於山勞而無功孰若取於民眾從之時餘黨尚數百人攻掠政和縣還慶元招龍泉良葛山葉七為教師由浦城流劫建陽所過焚掠分眾扼守鉛之車盤嶺行旅斷絕四月閩賊鄧茂七亦起邵武東南大震命都御史張楷督軍務偕都督劉聚副陳榮帥師討之至廣信宗留率其黨時出抄掠軍不敢進閩中日告急浙江藩司請楷便宜移兵先擊宗留可無後顧江西按臣亦言葉寇近咫尺危在旦夕大臣為國家排難專之可也楷左右顧有指揮戴禮奮身願往勦之楷乃命率兵五百以往

十三年戊辰夏六月刑部侍郎楊寧浙江錢唐出鎮江西豫章書

鉛山志云十三年十一月賊至黃栢鋪戴禮擊之死傷相

半宗留衣緋率衆前中流矢死官兵不知爲宗留也賊退入山復擁葉希八爲渠帥劫車盤嶺率衆駐十三都欲由桐塘回浦城副都督陳榮謂楷曰受命討賊奈延平事急而鉛道不通大軍密邇二賊並熾今遣部將往朝廷謂我輩逗留將若之何楷不得已命榮帥二千人與戴禮合命劉聚率江西兵趨建寧榮至鉛之祝公橋賊聞風用計誘入周道塢宋家磔兩山埋伏首尾相擊官兵大敗榮禮皆死榮馬自十三都躍入縣堂三跳而死楷益懼曰與其緩復裏而必急咽喉遂取道徑往閩中行委浦城何縣丞率死味緋墨嬰示糾勦亦率本府六縣民快以應十一月十五日與希八合戰橫山敗績顛被執死之人情益大恐以爲遂無信州矣鎮守侍郎楊寧時在會城乃與三司

議調南昌前衛及廣鉛二所官軍招集六縣民壯會於橫山迷不識路購得土著爲前導大軍隨之進發然終不能深入相持數月僅無亡失而已朝命聞敗遣尚書金濂寧陽侯陳懋保定侯梁瑤平江伯陳豫等率京營及南直江浙等兵討之以中官曹吉祥王瑾爲監軍兼制三省吉祥等素作威福濂以計留之于浙而與懋移兵駐廣信分道入福建未至希八乃使人從鉛弋間道厚自結于茂七互爲聲援此入彼出官軍首尾不能相應楷至建寧屢戰時有小勝輒以捷聞明年招下張由孫羅汝先等誘茂七出戰中流矢遂斬之擒其姪伯孫與家屬俘獻京師希八勢孤亦出降始知前黃柏舖緋衣中流矢死者乃宗留也賊平楷遂班師

按招降賊黨斬獲茂七者實由御史丁瑄而楷攘其功也詳見明書列傳又明書載遂昌民鄭仕本斬賊首葉宗留事在十四年與此互異

贛志云福建沙縣賊鄧茂七自稱閩王江西都指揮劉洪贛衛指揮馮廣領兵一千守石城十一月茂七黨陳椿八率衆數千入境邏者報賊止四五十順聞而輕之遣百人入賊營縱發火礮出其不意殺數十賊又縛其部總馮社長椿八大怒後三日盡率其衆攻城順復輕之城遂陷

十四年已春正月江西妖賊蔡妙光作亂捕平之三月閩賊陷瑞金夏五月陳懋等破鄧茂七賊巢獲其家屬并偽官二百餘人南安妖人羅天師伏誅

明書本紀

豫章書列卿表云正統十三年閩浙兩廣寇發命侍郎楊

寧鎮守尋推韓雍代寧巡撫之設已定於正統十四年矣

按韓雍傳云先巡按江西廬陵泰和盜起捕誅之鄧茂七反巡按福建御史汪澄牒鄰境會討俄以賊議降止兵雍曰賊果降退未晚也趣進兵賊復叛澄坐得罪死人以是服雍景泰二年用陳循薦巡撫江西時年甫三十豫章書列卿表乃沿譌也

董興傳云用薦擢署都督僉事充右叅將從寧陽侯陳懋討鄧茂七進都督同知南海黃蕭養劫獄嘯聚圍廣州安鄉伯張安戰死賊衆至十餘萬僭稱順天王王詔拜興左副總兵調江西兩廣軍往討以侍郎孟鑑贊理軍務興用天文生馬軾自隨至江西夜半聞雞鳴軾曰雞鳴不以時由賞罰不信也願公嚴軍令明年景泰改元二月師至廣州

蕭養中流矢死餘黨伏誅

景帝景泰元年庚午石溪民黃待宗煽亂江西巡撫楊寧徧發

諸郡掩捕之獲其渠首解京以南安當潮粵之交奏請修

築舊城寧陞禮部尚書去明年巡撫韓雍乃畢工南安事

考

天順元年丁丑秋七月革寧王護衛英宗本紀

按寧王奠培傳云景泰中弋陽王奠璫訐其反逆罪於

巡撫韓雍雍以聞帝遣官往讞逮軍民六七百人遇天

順改元赦不治第謫戍誘王為惡者教授遊堅奠培由

是憾守土官不為禮布政司崔恭拒奠培請囑遂誣劾

恭不法恭亦奏奠培私事按問恭奏皆實奪奠培護衛

改為南昌左衛以隸都司明書一事兩載郭子章大事

記亦沿訛今正之

四年庚辰王恕三原人為江西右布政使嶺寇犯贛州率師討平

之安輯流冗有方轉河南左轄何喬遠名山藏

六年壬午秋八月江西亂民朱紹綱伏誅明書本紀

贛志云朱紹綱入信豐縣界據新田裏羅老營場為巢大

掠者十餘載新田約長黃習率鄉勇搗其巢擒紹綱於螺

峰斬之

憲宗成化元年乙酉春二月廣賊寇贛州龍南巡按江西御史

陳選布政使翁世資按察使林鶚都指揮王貴討平之豫

章書

林鶚傳云成化初超遷江西按察使廣東寇剽贛州急調

兵禦之遁去廣信妖賊妄稱天神惑眾捕戮其魁立解散

八年壬辰草寇李福正聚眾於南村洞同知章廷圭討平之贛州蔡志

十五年己亥春三月復設鎮守太監先是正統間江西始用太

監鎮守隨復革去天順間復差太監葉達鎮守末年取回

至是復差太監劉佃鎮守豫章書

十八年壬寅閏八月廣東賊入江西大掠明書本紀

十九年癸卯立長沙營設守備統兵駐防又於羊角水置堡會

昌千戶所撥軍防守贛州兵寇志

二十年甲辰閩廣流寇犯境入瑞金總捕同知王廷珪督民快

禦之為所害同上

二十一年乙巳夏五月南贛盜起命僉都閔珪撫治之明書本

紀

閔珪傳云南贛諸府多盜率強宗家僕珪請獲盜連坐其

主法司議從之尹直輩謀之李孜省取中旨責珪不能弭

盜明年五月左遷廣西按察使

二十三年丁未秋八月石門賊楊九龍合武平賊劉昂攻破信

豐大掠龍南督守太監鄧原以聞命江西巡撫李昂督三

省兵討平之擒斬九龍等添設叅將於長沙營又置堡於

羊角水設隄備所又於龍南石城設守備行司瑞金安遠

設隄備行司贛州舊志

孝宗弘治三年庚戌程鄉賊彭錦糾邑賊黃秀琦出攻信豐大

掠境內龍南紀事

八年乙卯夏四月始設南贛巡撫冬十二月流賊掠江西明書

本紀

豫章書云弘治甲寅汀漳寇起嶺南湖湘不逞者四出剽掠為東南患於是鎮守江西太監鄧原巡按御史張縉暨藩臬臣議設巡撫憲臣開府於贛以統制之制下因推廣東左布政金澤遷都察院右副都御史俾巡撫江西兼督閩廣湖湘其所轄則江西之南安贛州建昌福建之汀州廣東之潮州惠州南雄湖廣之郴州四省三司皆聽節制賜之璽書許以便宜行事乙卯秋八月副都御史金澤總制江西莅任七年始得代去尋以事寧裁南贛巡撫大志云乙卯冬十月汀漳盜王魁蔡郎綱等流入信豐竹篙嶺龍南象塘堡大肆劫掠義民廖思閏老人陳受統率家屬擊敗之思閏及受死於陣

十年丁餘干民畢隆興姚十八聚眾作亂縣丞邱應檄福建

密兵平之

饒州事考

十二年己未冬十一月寧王覲錫

一作鈞

卒庶子上高王宸濠嗣

明鑑

宸濠傳云覲鈞立十年薨子宸濠其母馮針兒故娼也始生靖王夢蛇啖其室旦日鴟鳴惡之欲不舉母強舉之弘治八年封上高王十二年嗣宸濠輕佻無威儀鷙忍漁利而善以文行自飾術士李自然出入府中妄言王骨相天子也堪輿人李日芳言郡城東南有天子氣宸濠心喜

十五年

壬戌

春正月江西盜起都御史林俊勦散之

明書本紀

林俊傳云江西新昌民王武為盜巡撫韓邦問不能靖命俊巡視身入武巢武請自効悉擒賊黨詔即以俊代邦問

十八年

乙丑

春正月元旦廣寇破瑞金知縣萬琛失守遇害

贛

州兵寇志

萬琛傳云十八年正月劇盜大至琛率民兵數十迎敵殺賊二十餘人相持至明日力屈被執罵不絕口賊攢刺之乃死時有王祐者為廣昌知縣賊至民盡逃援兵又不至祐拔刀自刎其腹曰有城不能守何以生為左右奔奪其刀援兵稍集賊退越七日復突至祐倉皇赴敵死之

武宗正德元年

丙寅

巡按御史臧鳳上言四事一謂假兼制以

安地方南贛二府接連三省流賊出沒東西北方不相統攝文移約會動淹旬月以致賊多散逸事難就緒宜命都御史兼制四省接境府州隨宜調度則盜可息詔可施行

贛州謝志

二年

丁卯

夏五月內旨復寧王護衛屯田六月廣東賊入江西

明書本紀

明史紀事云宸濠遣內官梁安輦金銀二萬通劉瑾朦朧奏請准改南昌左衛為護衛

三年

戊辰

李承勳知南昌府時江西盜起瑞饒撫贛諸郡皆被

賊承勳多方防禦寇乃退

明書列傳

平姚源傳云正德三年有潘泰者自例監附逆瑾來知餘干政橫民不堪命萬春鄉余乾七與其黨朱顯一王浩八胡浩二梅祿一翁享四等入姚源谷中相聚為盜初未恣有屠人戴庚九捕殺賊黨吳珏六已而乾七報仇殺庚九聞之泰泰不禁乾七等益無憚饑寒無賴者爭從之數月眾至萬人

四年巳王哲以僉都御史巡視南贛汀漳等處會江西盜起

命哲往撫既至黜貪吏去苛政盜皆解散叅議俞諫計擒
程鄉賊酋鍾士高陳五長等往年為安遠信豐害者駐師

三月民不知兵

贛州志

雩都紀事云正德己巳十一月二十三日禾豐走報有武
平賊自長河燒村來時已昏夜城中人不設備賊五鼓渡
河從城西角梯而入時袁僉事某聞賊陷城出避萬壽僧
舍賊從閣上邏得見其氣壯言正不加害挾之同宿布政
行司前梅氏祠次日將撤營去有留之者因復駐掠城中
婦女二百餘人燒燬房屋殆半殺孫嘉亨等五人其留賊
者賊疑之亦見殺

平姚源傳云四年副使吳一貫遣百戶鄭鑑捕盜古埠遇
害賊懼而乞降一貫殺降賊百人又以密兵三千人襲姚

源賊覺扼其險無得脫者邑生桂秀率子弟鄉民與賊戰
於回跋大敗父子及門人俞相俱死又撫州盜起西鄉賊
張馬七起三塘甚驚

五年

庚秋

八月劉瑾伏誅兵部奏革寧王宸濠護衛仍為南

昌左衛

明史紀事

豫章書云是年用福建鎮守太監張俊巡按御史賀泰議
復設南贛巡撫

瑞州雜志云五年七月高安陳福一羅長一奉新胡雪二
嘯聚郡界之華林山連劫庫獄暨臨江奉新靖安建昌諸
府縣脅從擄質至萬人復分踞越王瑪瑙仙女雞冠山等
寨官司且撫且捕惟華林賊尚熾
興國蔡志云庚午七月流賊寇城火二日不滅十二月賊

還自萬安通判徐圭擒其副殺之賊乃遁

平姚源傳云五年春僉事張昊見東西賊相峙方謀招東賊以討西賊冬都御史王哲鎮守太監王嵩檄昊營餘干古埠叅政董朴營樂平珠田叅議居達營安仁吳山約日進兵攻姚源昊進畚塘賊兩衝營敗去朴約昊進梁山朴麾下千戶姜金遇賊奔還營兵潰自相蹂踐死傷無數昊被執斫其面其僕衛之曰吾主張僉事也賊殺僕釋昊千戶李俊戰死軍民官高珏史文耀蘇大觀等俱死鄉官典史吳祚與賊遇梁家坂斬賊十三人身被二十七鎗死無完膚義兵頭目孫秀葉奇十等死者六十人

六年

辛未

春三月江西賊破新喻諸縣夏四月贛賊陷新淦執

叅政趙士賢靖安賊據越王嶺華林賊陷瑞州府撫州東

鄉饒州姚源盜皆大掠命都御史陳金率兵討之五月賊

劉六等自湖廣入江西秋七月江西盜攻臨江府官兵敗

績冬十月廣福賊入江西連破州縣

明書本紀

大志云九月廣東福州流賊三千餘人入永豐縣知縣朱

璉逃去遂破樂安新淦知縣申惠等被執都御史陳金調

兩廣土兵分道勦捕

撫州兵氛志云臨川東鄉盜徐仰四艾茹七等作亂殺官

兵知縣龍誥督民兵薄賊巢幾被執都御史陳金以所調

狼土軍討平之乃議建東鄉縣

南康紀事云五月河南盜乘舟入湖廣掠黃州都指揮張

墳追敗之乃趨江西掠星子都指揮趙鉞敗之左蠡

贛志云六年程鄉賊鍾仕錦攻劫附近鄉邑都御史周南

招降賊首何積玉及餘黨千餘人擒仕錦戮之安插朱貴等三百餘人於羊角水後積玉復叛知縣蔡夔督民兵格殺之安插餘黨葉芳等為新民

七年壬申春正月南贛巡撫都御史周南率兵攻破大帽等山

寨盡平之大帽山界江閩廣三省賊首張番壇李四仔鍾

聰劉隆黃鏞等聚徒數千攻陷石城萬安諸縣南分遣江

西兵從安遠入攻破巢穴七廣東兵從程鄉入攻破巢穴

九福建兵從武平入攻破巢穴八擒番壇等悉斬之俘獲

賊屬奪回良善甚眾二月江西按察司副使周憲率兵討

廬山左湖盆塘賊敗之擒斬數百人四月憲移軍攻華林

賊陳福一等於仙女寨拔之進克雞公嶺先後擒斬千餘人進

薄華林絕其出道賊益窘先是陳金檄憲等分兵三路討

賊五月憲信謀者言賊眾饑疲遂檄兵夾攻其二路失期

不至憲獨深入山谷峻險賊憑高發擗石如雨兵敗憲被

執刀中憲首血流滿面左髀復中鎗不能行大罵賊不絕

口賊怒支解之子幹見父被執躍馬直前中流矢力戰墮

崖死賊勢復振事聞贈憲官謚忠愍旌其子六月南昌知

府李承勳會同按察使王秩督兵進攻華林賊承勳招降

賊帥黃奇置麾下任用之奇感奮誓以死報乃令奇入賊

寨說其黨多來降者承勳令土酋岑猛選精兵五百人夜

與俱至山下令奇密入寨誘所與約降者來即遣之為內

應乃與猛帥五百人銜枚登山奇與數人前導至壘賊方

鼾睡直夜者擊三更奇拔柵率眾入五百人奮刀斫之內

應降賊合勢夾攻賊倉猝不知所為求甲仗皆不得斬首

三千餘級餘衆奔出壘乘夜逃匿山谷候曉搜山又斬獲千餘人華林賊遂平移兵擊靖安瑪瑙寨賊胡雪等盡俘之金奏江西華林賊已勦平姚源賊王浩八願撫加金太子少保餘論功賞有差

明史紀事

大志云七年五月撫州東鄉賊平初賊王珏五徐仰三等聚衆萬餘人作亂陳金調兩廣目兵同官軍討之令叅議徐蕃都指揮陸潮等屯毋城僉事高賓都指揮王爵等屯黎虛僉事李嘉言都指揮楊懋屯野塘兩廣副總兵張勇總統官軍土官岑塗岑猛統目兵分道並進敗賊于熟塘再克于南壕復連捷于赤岸蔭嶺前後斬首萬餘級俘七百五十餘人破二百六十五柵事聞皆陞賞姚源賊殷勇十洪端七等構亂猖獗金受命總制募鄉兵得五六萬人

令叅政董朴軍餘千吳廷舉軍安仁僉事高賓軍貴溪鄭宣軍樂安都指揮許時軍鄱陽而布政使任漢統之據山立寨分守要害賊出輒遏其歸間發兵搗巢穴俘斬千餘人殷勇十重創死已而勇以廣西目兵至毒弩蹶張所向破竹俘斬又四千餘人金喜以功在頃刻乃與諸道領兵官置酒高會賊覘知諸要害無守者乃悉所有賂土官因兵懈乘夜遁去時賊不食已三日轉掠衢徽間廷舉以安仁民兵及目兵追及于弋陽目兵所在攘掠居民遮訴俱不省由是將驕卒悍上下解體金乃倡招撫立縣之議賊欲歛師偽降攻剽如故

龍南紀事云七年山賊黃秀璣謝越賴振祿集衆劫掠鄉邑後贛撫蔣昇招降之

八年癸酉春正月江西賊王浩八等復大掠命都御史俞諫等討平之冬十月東鄉姚源賊復叛尋平之

明書本紀

明史紀事云八年正月姚源賊王浩八等復作亂率五洞蠻兵與東鄉賊分劫州縣命操江副都御史俞諫提督軍務同總兵劉暉率狼兵進勦四月兵備副使胡世寧約王賽一內應引兵征東鄉劇賊樂庚二陳邦四等盡擒之東鄉故賊巢世寧撫禦反側務立信義庚二邦四復叛悉擒馘賽一欵順有功奏原其死既而備城濠立縣治百姓晏然五月叅政吳廷舉單騎入姚源諭降劇賊王浩八等爲賊所留耀武劫威廷舉不爲動久之因得識其左右有謀勇者陰結之使結其渠因奉廷舉歸總制都御史俞諫聞廷舉被執移兵姚源進勦知府李承勲曰賊乏食必掠裴源積粟請贖兵及南昌兵分兩翼伏裴源待之賊果至大敗遁去初賊聞狼兵至頗懼欲降按察使王秩受之已有約議者以賊反覆不可信欲乘兵威撲滅取降者殺之賊復大亂棄巢奔突四出劫掠徽衢等處民被其害六月總督浙江軍務都御史陶琰巡撫應天都御史王縝會總制江西都御史俞諫夾攻姚源賊王浩八于徽衢平之初琰慮姚源賊聽撫難信豫爲之防至是果突入境督兵會勦餘黨悉平總制俞諫奏立東鄉萬年二縣分治地方撫安人民從之十二月諫調兵征建昌賊徐九齡等平之建昌賊爲患數年勢逼益府官軍不能討至是諫命師悉擒以還

大志云江西賊徐九齡嘯聚建昌縣之醴源負固劫掠出

沒江湖間德安鄱陽九江湖口咸被其毒都御史俞諫督兵討之豐城知縣吳嘉聰率眾先登破袋嶺擒其從賊顏曰和等二十一人餘衝高安主簿袁瑤率兵遏之賊敗走瑤亦戰死九齡急引眾冒雨夜遁出完岡兵備副使宗璽扼之于青頭岡斬九齡及其黨醴源遂平

按大志誤作正德十年今從明書改正蓋討賊事在八年賊平則于九年也

平源傳云八年王浩八襲執參政吳廷舉數月乃出復勅御史俞諫討賊八月賊陷萬年縣殺副使李情通判陳秦碧等十二月調大同參將桂勇總兵劉暉遊擊賈鑑赫江參將李隆湖廣都指揮陳表福建參政王子言副使湯沐各領所部兵討賊鑑善騎射直抵賊壘吳廷舉以計誘翁享四擒縛王浩八由是蔡六三劉昌三胡浩二等俱就擒餘黨始聽招撫賊平定萬年縣版籍吳祚加承德郎蔭一子有司以禮葬桂秀于東山

按賊平在十二月與明書本紀及明史紀事不合錄之以備參考

九年甲戌春三月再復寧藩護衛屯田同上

明史紀事云陸完為兵部尚書宸濠喜曰全卿完字為司

馬護衛可復得矣致書欲復護衛完答書須以祖訓為言

時伶人臧賢有寵錢習張銳張雄輩皆陰結之賢婿司鉞

坐法充南昌衛軍宸濠因之以通于賢每手書寄賢字賢

為良之至是輦載金寶于賢家分饋諸權要大學士費宏

知之宣言曰寧王以金寶鉅萬復護衛苟聽其所為吾江

西無噍類矣陸完知宏必阻之乃密謀于錢寧等會三月
十五廷試進士內閣與部院大臣皆在東閣讀卷完遂於
十四日投覆寧王乞護衛疏十五日中官盧明以疏下閣
密約楊廷和出下制許之宏竟不與聞會言官交章論護
衛不可復乃謀去宏傳旨令宏致仕宏南歸舟至清源宸
濠黨陰遣人入舟縱火行李皆為煨燼宸濠自稱國主安
傳護衛為侍衛改令旨為聖旨六月宸濠密令承奉劉吉
等招劇盜楊清李甫王儒等百餘人入府號把勢八月宸
濠因有上賜令撫臣以下朝服見俞諫不可又嘗去其左
右為惡者宸濠深銜之十月宸濠招鄱陽賊首楊子喬統
賊徒楊清等肆行劫掠

俞諫傳云九年擊臨川賊斬其魁遣叅將李隆擊新淦賊
賊踞萬山中僭稱王者八年隆等深入悉就擒俘斬千七
百餘人錄功進諫右都御史巡撫如故

金谿志云九年贛州賊起兵備副使胡世寧行縣委官選
機兵四百名赴廣昌防守

十年^{乙亥}春二月寧王宸濠招舉人劉養正入府密謀宸濠聞

養正有才名習兵法延至府講論宋太祖陳橋之變養正
盛稱宸濠有撥亂才密約待時舉事夏六月宸濠忌都指
揮戴宣擅捶殺之冬十月江西按察司副使胡世寧奏寧
王無道罪狀下兵部移文寧府令鈐束其下以河南左布
政孫燧為都察院右副都御史巡撫江西先是俞諫以忤
宸濠奪官閑住宸濠謀益橫腹削百姓輦珍寶結禁近為
奧援及結連各洞寨逋賊縱其流劫鎮巡藩臬以正自持

者百計去之畏禍者遂翕然依附燧知大變將作乃均征賦飭戎備實倉儲散鹽利偵姦黨置之法以翦其羽翼宸濠奏副使胡世寧離間親親妖言誹謗賄營內旨逮之下錦衣獄世寧獄中三上書言江藩橫逆朝野皆聞微臣愚戇天日共鑒訊鞫榜掠幾死

明史紀事

十一年丙子夏五月宸濠欲拓府居擬大內左布政張嶺以非制拒之秋九月宸濠奪官池賄李士實張嶺持不可冬十月以王守仁為都察院右僉都御史巡撫南贛汀漳等處

同上

王守仁傳云十一年八月兵部尚書王瓊奇守仁才薦擢

南贛巡撫當是時南中盜賊蜂起謝志珊一作山據橫水左

溪桶岡池仲容據剎頭皆稱王與大庾陳曰能樂昌高快

馬等攻剎府縣而福建大帽山賊詹師富等又起前巡撫

文森託疾避去志珊合樂昌賊掠大庾攻南康贛州贛縣

主簿吳玘戰死守仁至知左右多賊耳目乃呼老黠隸詰

之其隸戰栗不敢隱因貫其罪令詞賊動靜無弗知於是

檄福建廣東會兵先討大帽賊

王文成全書云十一年七月郴州賊首龔福全

七年就撫給冠帶為

官張打旗號僭稱延溪王李賓黎穩梁景聰僭稱總兵都

督將軍名目其餘徭賊千數出劫樂昌及江西南康等縣

拒敵官軍後蒙撫諭將賊首高重仁李賓給與冠帶重設

徭官未寧半月仍前出劫

十二年丁丑秋七月南贛巡撫王守仁請提督軍務許之

明書

列傳

宸濠傳云十二年典儀閣順內官陳宣劉良間行詣闕上
變寧賢等庇之不問宸濠疑出承奉周儀殺儀家及典仗
查武等數百人巡撫孫燧列其事中道爲所邀不得達宸
濠又賂寧賢求取中旨召其子司香太廟寧言於帝用異
色龍牋加金報賜異色龍牋者故事所賜監國書牋也宸
濠大喜列牙受賀與士實養正日夜謀恐起事以反名人
心不服伺宮車一日晏駕大位未定乘變即起遣奸人盧
孔章等分布水陸孔道萬里傳報浹旬往返蹤跡大露
孫燧傳云燧察副使許逵忠勇可屬大事多與謀又懲胡
世寧事未敢訟言于朝托禦他盜曲爲備先城進賢次城
南康瑞州惠建昌縣多盜割其地別置安義縣以漸弭之
請復饒撫二州兵備撫不得復則請勅湖東分巡兼理之
請重九江兵備道權兼攝南康寧州武寧瑞昌及湖廣興
國通城以便控制廣信橫峰青山諸窰地險人悍請設通
判駐弋陽兼督旁五縣兵又恐宸濠劫兵器假討賊盡出
之他所宸濠矚燧圖已使人語諸幸臣去燧而遺燧棗梨
二物以示意燧笑却之逵勸燧先發後聞燧曰奈何予賊
以名且需之

費宏傳云宏族人與邑奸人李鎮等訟宸濠陰令鎮賊宏
鎮等遂據險作亂率衆攻費氏索宏不得執所與訟者支
解之發宏先人家毀其家劫掠遠近衆至三千人宏馳使
懇于朝下巡撫孫燧按狀始遣兵勦滅

明史紀事云十二年二月巡撫南贛都御史王守仁以前
者多調狼達土軍糜費踰萬乃使四省兵備官於各屬督

手打手機快中選驍勇有膽力者縣千人少或八九百選最者優廩餼署爲將領其兵備原額官軍汰老弱三分之一各縣賢能官統之專守城隘所募精兵隨各兵備官屯札別選官分隊統習之於是各縣屯戍旣足防守兵備召募者又可應變出奇盜賊漸知所畏三月守仁調三省兵攻信豐龍南流賊連敗之賊突至信豐守仁令乘險設伏厚集以待之乃潛兵往徑道夾攻賊奔潰於象湖山拒守又潛搗其巢穴大敗之賊復潰入流恩山岡等巢尋遁去宸濠令王春余欽等招募劇盜凌十一閔廿四等五百餘人四集亡命同楊清等藏丁家山寺劫掠官軍民財商貨復厚結廣西土官狼兵并南贛汀漳洞蠻欲圖爲應遣人往廣東收買皮帳製作皮甲及私製鎗刀盔甲并佛郎機銃兵器日夜造作不息五月守仁調兵攻何塘洞山寨賊酋詹師富等及長富村等處二十餘巢平之其脇從餘黨願帶家口出官聽撫守仁委官安插復業四千餘人復檄知府季數調兵擒賊帥陳曰能平其巢穴七月守仁請提督軍務許之初守仁上疏論狼兵所過不減于盜轉輸之苦重困于民乃請便宜行事期于成功不限以時兵衆旣練號令旣明事無掣肘可以相機勦滅衆迂其議屢不報尚書王瓊慨然曰朝廷有此等人不與以柄又將誰用因守仁疏覆議即奉旨改提督南贛汀漳等處軍務十月守仁討汀州左溪賊藍天鳳等平之天鳳等與贛南下新穩下等洞賊雷文聰高文輝等盤踞千里守仁集從事議曰諸巢爲患雖同事勢各異以湖廣言之則桶岡諸巢爲賊

之咽喉而橫水左溪諸巢為之腹心以江西言之則橫水左溪諸巢為賊之腹心而桶岡諸巢為之羽翼今不先去腹心之患而欲與湖廣夾攻桶岡進兵兩寇之間腹背受敵非吾利也况賊但聞吾檄湖廣夾攻桶岡橫水左溪必觀望未備出其不意可以得志橫水左溪既破移兵桶岡勢如破竹矣乃遣都指揮許清率兵自南康新溪入知府邢珣率兵自上猶縣石人坑入知縣王天與率兵自上猶縣白面峪入皆會橫水指揮當作守備郊文率兵自大庾縣義安入知府唐淳率兵自大庾縣聶都入知府李敷率兵自大庾縣穩下入縣丞舒富率兵自上猶縣金坑入皆會左溪知府伍文定知縣張戢各率兵從上猶南康分入以遏奔軼守仁親率兵千餘自南康進搗橫水與諸軍會分布

既定乃以初七日分道並進守仁至橫水謝志珊等倉卒據險拒之守仁未至賊巢三十里駐兵夜募鄉兵善登山者四百人各執一旗賫銃礮由間道攀崖上險分布近賊巢左右極高山頂伏覘賊度我兵至險舉礮火應又豫遣壯士緣崖上險奪發其滾木礮石十二日守仁率兵進至十八面隘賊方憑險迎敵忽聞近巢諸山頂礮聲如雷煙焰漲天守仁麾兵進逼之賊大驚失措謂官兵已盡得其巢穴遂棄險走我兵乘勝驟進指揮謝杲當作馬廷瑞兵由間道先入焚賊巢賊退無所歸大奔潰遂破橫水大巢邢珣王天與各破數巢皆會于橫水郊文唐淳等各破數寨皆會於左溪會天霧雨休兵謀知諸潰賊收集餘眾據險立柵然倉猝無資糧守仁乃下令各營皆分兵為

奇正二哨一前攻一後繼用土人為鄉導自是諸營各分
 道破餘巢伍文定張戢亦連破數巢入會左溪賊悉平十
 一月守仁會兵攻桶岡初守仁乘橫水左溪之勝遣人諭
 以禍福桶岡賊鍾景納款使人夜入賊巢期以初一日于
 是籠出降賊万恐見使至皆喜而橫水左溪賊持不可
 遲疑未決守仁遣使于鎖匙籠促降而別遣邢珣率兵入
 茶坑伍文定率兵入西山界唐淳率兵入十八磊張戢率
 兵入葫蘆洞俱冒雨入藍廷鳳方于鎖匙籠聚議忽聞諸
 兵已入險皆震愕急奔入內隘阻水為陣邢珣麾兵渡水
 前擊張戢衝其右伍文定又自張戢右懸厓繞出賊旁賊
 敗走舒富王天與亦由鎖匙籠入賊悉眾奔十八磊唐淳
 嚴陣迎擊之賊大敗明日合勢併擊邢珣先破桶岡大寨

諸軍奮勇爭進俘斬甚眾湖廣兵亦至賊餘黨遁入山谷
 守仁遣諸將分道捕之于是橫水左溪桶岡之賊略盡賊
 首藍廷鳳蕭貴模等皆斬獲無遺守仁出師凡兩月平賊
 巢八十四處遂議于橫水地方建城設縣控禦三省

王文成全書云十二年二月龍南反招賊首黃秀魁糾合

廣東龍川縣泃頭賊首池大鬚即仲容大安大昇等共為一

陣賊首楊金巢自為一陣勢甚猖獗南康縣丞舒富統兵
 快交鋒殺死二十餘人賊眾擁至殺手陳禮魴百長鍾德
 昇等潰走南康報効義士楊習舉戰死經歷王祚被執富
 與義民蕭承千戶林節收集眾兵退至南營山把截後賊
 差人告招本道楊璋差蕭承往撫放回王祚賊返原巢又
 委百長王受等同已招賊首黃秀璣往安遠截捕流賊賴

振祿等行至湖江背秀璣反招令伊弟大滿細滿等燒燬
劉必甫房屋仍與振祿連謀行劫受督率兵快于黎坑際
下殺獲黃秀璣大滿細滿積瑜首級四顆四月池大鬚串
同反招賊首黃秀魁陳秀顯等糾衆四百餘打劫千長何
甫等家王受率兵夫于陳坑水交鋒殺獲首從賊人陳秀
顯等一十二顆餘賊遁歸巢又大庾縣隘長張德于界首
南流坳殺獲湖廣輦賊首唐飛劍及嚴宗清首級二顆

守仁傳云更兵制二十五人爲伍伍有小甲二伍爲隊隊
有總甲四隊爲哨哨有長協哨二佐之二哨爲營營有官
叅謀二佐之三營爲陣陣有偏將二陣爲軍軍有副將皆
臨事委不命于朝副將以下得遞相罰治其年九月進兵
大庾志珊乘間急攻南安知府季燾擊敗之副使楊璋等

亦生繫曰能以歸遂連破橫水左溪桶岡志珊貴模廷鳳
面縛降時湖廣巡撫秦金亦破羅福全其黨千人突至諸
將擒斬之乃設崇義縣于橫水控諸徭還至贛州議討剌
頭賊初守仁之平師富也龍川賊盧珂鄭志高陳英咸請
降及征橫水剌頭賊將黃金巢亦以五百人降獨池仲容
未下橫水破仲容始遣弟仲安來歸而嚴爲戰守備守仁
勞以牛酒問故仲容詭言珂志高讎也將襲我故爲備守
仁佯杖繫珂等陰使珂弟集兵以待遂下令散兵歲首大
張燈樂

十三年

戊寅

春正月江西兵平剌頭及討九連山賊平之

明書

本紀

守仁傳云賜池仲容以新曆誘入謝仲容率九十三人營

教場自以數人入謁守仁呵之曰若皆吾民屯于外疑我乎悉引入祥符宮厚飲食之賊大喜過望守仁密進兵留仲容觀燈樂正月三日大享伏甲士於門諸賊入以次擒戮之自將抵賊巢連破上中下三泖斬馘二千有奇餘賊奔九連山山橫亘數百里陡絕不可攻乃簡壯士七百人衣賊衣奔崖下賊招之上遂據其險官軍進攻內外合擊擒斬無遺乃于下泖立和平縣置戍而歸自是境內大定初朝議賊勢強發廣東湖廣兵合勦守仁上疏止之不及桶岡既滅湖廣兵始至及平泖頭廣東尚未承檄守仁所將皆書生及偏裨小校平數十年巨寇如拉朽遠近驚為神進右副都御史

費宏平泖記云正月癸卯肅公度諸兵已集引仲容入併其黨擒之出盧珂等所告訊鞫具伏亟使人約諸兵入巢越四日丁未同時並進其軍于龍川者惠州知府陳祥率通判徐璣等從和平都入指揮姚璽率新民梅南春等從烏龍鎮入孟俊率珂等從平地水入軍于龍南者贛州知府邢珣率同知夏克義知縣王天與等從太平保入推官危壽率義民葉芳等從南平入守備指揮郝文率義官孫舜洪等從冷水逕入指揮余恩率百長王受等從高沙保入軍于信豐者南安知府季敷率訓導藍鐸等從黃田岡入縣丞舒富率義民趙志標等從烏逕入公自率中堅搗下泖大巢副使楊廷宜督餘哨會于三泖賊黨自仲容至顛備已弛聞官兵驟入皆驚失措分投出禦悉精銳千餘迎敵于龍子嶺我兵列為三衝犄角而前恩以王受兵首

與賊戰却之奮追里許賊伏四起擊受危壽乃以芳兵鼓譟往援復復以珂等兵從旁衝擊呼聲震山谷賊大敗而潰遂并上中二洲克之各哨兵乘勝奮擊是日破巢十一曰熱水五花障淡方石門上下陵芳竹湖白沙曲潭赤塘古坑三坑明日分道擊賊已酉破巢凡六曰鐵石障羊角山黃田坳嶺岡塘含岡尾溪庚戌破巢二曰大門山鎮里寨辛亥破巢九曰中村半逕都坑尺八嶺新逕古地空背旌嶺頓岡癸丑破巢四曰狗脚坳水晶洞五洞藍洲丙辰破巢二曰風盤茶山其奔者尚八百餘徒聚于九連山山峻而袤廣與龍門山後諸巢接慮其勢合難制乃選銳士七百餘人衣所得賊衣乘暮而入賊以爲其黨也從崖下招呼我兵亦佯與和應已度險扼其後路明日賊始覺併力來敵我兵從高臨下擊敗之公度其必潰豫戒各哨設伏以待乙丑覆之于五花陣于中村于北山于風門坳分逃餘孽尚三百餘各哨會兵追之二月辛未復與戰于和平甲戌戰于上下坪丁丑戰于黃田坳辛巳戰于鐵障山癸未戰于乾村于梨樹乙酉戰于劣竹壬辰戰于百順于和洞乙未戰于水源于長吉于天堂砦謀報各巢稔惡者已盡惟脅從二百餘聚九連山谷呼號乞降遣珣往撫之籍其名處之白沙乃經理立縣設隘班師而歸時戊寅三月丁未也

孫燧傳云十三年江西大水宸濠素所蓄賊凌十一吳三閔念四等出沒鄱陽湖燧與達密謀捕之三賊遁沙井燧自江外掩捕夜大風雨不克濟三賊走匿宸濠林墓間

江西通志 卷三十一
于是密疏白其狀且言宸濠必反章七上輒為宸濠遮獲
不得達

十四年^已夏六月丙子寧王宸濠反巡撫孫燧副使許達死
之遂陷九江南康兵備曹雷知府陳霖等遁走已丑宸濠
兵圍安慶知府張文錦等守禦却之秋七月都御史王守
仁知府伍文定討宸濠遂入南昌宸濠解安慶圍還救至
鄱陽湖擊敗之丁巳復戰遂擒之同上

明史紀事云二月宸濠持重賂交通南京留守太監劉琅
四月孫燧自劾乞罷不許五月遣太監賴義駙馬都尉崔
元都御史顏頤壽戒飭宸濠時江彬錢寧有隙太監張忠
等欲借彬以傾寧會宸濠令南昌生徒保舉孝行挾孫燧
并巡按御史王金奏其事燧等欲緩其逆謀具疏上之上

見奏驚曰百官賢當陞寧王賢欲何為且將置我何地耶
張忠乃乘間言朱寧臧賢交通寧王謀不軌稱王孝譏陛
下不孝也稱王早朝譏陛下不朝也上領之東廠太監張
銳大學士楊廷和初亦黨宸濠為復護衛已而銳知有反
謀且知上入忠言乃與廷和謀欲復革去護衛以免後患
于是御史蕭淮疏稱寧王不遵祖訓包藏禍心招納亡命
反形已具疏入江彬張忠贊其說遂勅義等往革其護衛
崔元過廷和詢之廷和曰宣德中有疑于趙府嘗令駙馬
袁泰往竟得釋或此意也元等遂行而京師競傳以為且
擒治寧王值卒林華者始匿臧賢家兼程逃歸以六月十
三日至江西值濠生日宴鎮巡三司等官聞報大驚蓋舊
日擒荆王時差太監蕭敬駙馬蔡震都御史戴珊過南昌

宸濠親見之遂以爲此必擒我不復記廷和所云趙府事也罷宴密召劉養正劉吉等謀之養正曰事急矣明早鎮巡三司官入謝宴可就擒之殺其不附已者因而舉事乃夜集賊首吳十三凌十一閔念四等飭兵器以候待旦急召致仕侍郎李士實入以謀反告之士實唯唯而已尋各官入謝拜畢左右帶甲露刃侍衛者數百人宸濠出立露臺大言曰太后有密旨令我起兵入朝監國都御史孫燧毅然曰密旨安在濠曰不必多言我今往南京汝保駕否燧張目厲聲曰天無二日臣安得有二君太祖法制在誰則敢違濠大怒命縛燧衆駭愕相顧失色副使許逵大呼曰孫都御史朝廷大臣汝反賊可擅殺耶顧燧語曰我欲先發不聽今制於人尚何言濠并縛之訊逵且何言曰惟有赤心耳豈從汝反且縛且罵賊捶折燧左臂并執逵喝校尉火信等拽出惠民門外殺之遂執御史王金主事馬思聰金山右布政胡濂叅政陳杲劉斐叅議許效廉黃宏僉事顧鳳都指揮許清白昂并太監王宏俱械鎖下獄思聰黃宏不食死逆黨舉人劉養正至宸濠自出城迎之養正嘗言帝星明江漢間故屬意宸濠至是與李士實謀令叅政季敷僉事潘鵬師夔持檄諭降諸郡縣左布政梁宸廉使楊璋副使唐錦爲所脇移咨府部傳檄遠近革正德年號指斥乘輿以士實養正爲左右丞相叅政王綸爲兵部尚書總督軍務大元帥分遣逆黨婁伯王春等四出收兵戊寅閔念四吳十三等奪船順流攻南康知府陳霖等遁走進攻九江兵備副使曹雷知府汪穎等亦遁城俱陷

宸濠即令師夔居守婁伯至進賢知縣劉源清誅之提督南贛軍務都御史王守仁移檄遠近暴露宸濠罪惡起兵討之先是福建三衛軍人進貴等作亂兵部尚書王瓊知宸濠且反謂主事應典曰進貴亂小事不足煩王守仁但假此便宜勅書在彼手中以待他變可也乃具題降勅令守仁查處福州亂軍故宸濠之叛江西守臣俱遇害被執惟守仁以往勘福建出六月初九日自贛起行十五日守仁至豐城知縣顧佖告宸濠反守仁易服潛至臨江幾為宸濠所及臨江知府戴德孺聞守仁至喜迎入城調度守仁曰臨江居大江之濱與省會近且當道路之衝莫若抵吉安為宜又以三策籌之曰宸濠若出上策直趨京師出其不意則宗社危矣若出中策趨南都則大江南北亦被其害但據江西省城則出下策勤王易為也行至中途恐其速出乃為計佯奉密旨先知反狀令兩廣湖廣都御史楊旦秦金暗伏要害地方以俟寧藩兵至復取優人數輩厚賞以全其家令其至伏兵處所飛報竊發日期將公文縫置袷衣絮中臨發適捕李士實家屬至故縱之令其奔報宸濠邏獲優人果于衣絮中搜得公文不敢即發庚辰守仁飛報宸濠反王瓊宣言曰有王伯安在何患不久當有捷報耳丁亥守仁集兵糧傳檄四方諸郡縣知府伍文定等皆至議所向守仁曰兵家之道急衝其鋒攻其有備皆非計之得我故示以自守不出之形彼必他出然後尾而圖之先復省城搗其巢穴俟彼還兵來援邀而擊之此全勝之策也秋七月宸濠率兵出江西留其黨宜春郡王

拱櫛同內官萬銳等守南昌自與拱楨李士實劉養正閔念四等六萬人號十萬以劉吉爲監軍王綸爲叅贊指揮葛江爲都督載其妃媵世子從總一百四十餘隊分五哨出鄱陽舳艫蔽江而下聲言直取南京太監畢貞守浙江許起兵應之戊戌宸濠趨安慶知府張文錦都指揮楊銳指揮崔文令軍士鼓譟登城大罵之宸濠遂留攻安慶僉事潘鵬安慶人也宸濠令鵬遣家屬持書入城諭降崔文手斬之磔其尸投城下宸濠令鵬至城下說之文引弓欲射鵬走免張文錦即鵬家盡誅之宸濠盡攻擊之術不能克癸卯守仁率知府伍文定等起兵會于臨江樟樹鎮于是知府戴德孺引兵自臨江徐璉自袁州邢珣自贛州通判胡堯元童琦引兵自瑞州通判談儲推官王暉徐文英新淦知縣李美泰和知縣李楫寧都知縣王天與萬安知縣王冕各以其兵至十八日巳酉至豐城或謂當與安慶夾攻守仁曰不然我師越南昌下與寧王持江上安慶之衆僅能自保必不能援我于中流而南昌兵議其後絕我糧道南康九江又合勢乘之腹背受敵非利也不若先攻南昌寧王久不克安慶精銳皆出守禦必單弱我兵新集氣銳南昌可克也寧王聞我攻南昌必解安慶圍還兵自救暨來我師已克南昌彼聞之自奪氣首尾牽制此成擒矣乃分兵爲十三哨哨三千人少者千五百人令文定等各攻一門以四哨爲遊兵策應之謀報寧王伏兵千餘在新舊墳厰爲城中聲援遣知縣劉守緒夜從間道襲破之十九日發兵以二十日昧爽各至汎地下令曰一鼓附城

再鼓登三鼓不登誅四鼓不登斬其隊將又先期為榜入諭城中居民令各閉戶自守勿助亂昇攻具至城下梯鉅而登城上雖設守禦聞風倒戈兵遂入贛州奉新等兵皆降盜多肆殺掠守仁執數人斬之衆稍定擒拱櫟及萬銳等十餘人宮中皆縱火自燒死不盡者拘繫之散遣脅從籍封府庫城中始安宸濠聞守仁帥兵攻南昌大恐士實等勸宸濠舍安慶徑取南京既即大位江西自服宸濠不從解安慶圍移兵泊阮子港先遣兵二萬援江西宸濠自率大軍繼之二十二日撫州知府陳槐亦帥兵至二十三

日諜報宸濠先鋒至樵舍守仁令伍文定以正兵當其前余恩繼其後邢珣帥兵繞出賊背徐璉戴德孺張兩翼分擊之諸將各受命出二十四日乙卯賊兵乘風鼓譟而前逼黃家渡氣驕甚文定與恩佯北致之賊爭進趨利邢珣兵從後急擊橫貫其陣賊敗走文定恩還兵乘之德孺璉合勢夾擊賊大潰追奔十餘里擒斬二千餘級溺水死者萬計賊氣大沮退保八字腦是日建昌知府曾璵等帥兵至守仁謂九江南康不復湖廣援兵不能達乃別遣知府陳槐合知府林城兵攻九江知府曾璵合知府周朝佐兵攻南康宸濠大賞將士盡發南康九江兵至丙辰并力合戰官兵少却死者數百人文定急斬先退者以殉身立礮銃間火焚其鬚鬢不移足士殊死鬪兵復振礮及宸濠舟賊遂大敗殺溺者甚衆退保樵舍聯舟為方陣盡出其金帛賞士文定等乃為火攻之具邢珣擊其左徐璉戴德孺擊其右余恩等分兵四伏期火發兵合丁巳宸濠朝羣臣

執其不盡力者將斬之爭論未決官兵四集奮擊之火及宸濠副舟賊復大潰宸濠妃嬪皆赴水死將士執宸濠及其世子郡王儀賓并偽丞相元帥等官李士實劉養正劉吉涂欽王綸熊瓊羅璜王春吳十三凌十一葛江火信等數百餘人被執脅從太監王宏御史王金主事金山按察使楊璋僉事王疇潘鵬叅政陳杲布政司梁宸都指揮邨文馬驥白昂等擒斬賊黨三千餘級溺水死者約三萬棄其衣甲器仗財物與浮尸積聚橫亘若洲餘賊數百艘四散逃潰遣兵分勦破之于樵舍又破之于吳城守仁所遣曾璵陳槐亦攻復九江南康二郡初宸濠謀反妃婁氏泣諫不聽及宸濠被擒于檻車泣語人曰昔紂用婦人言而亡天下我以不用婦人言而亡其國守仁爲求婁妃尸葬之得宸濠交賄大小臣僚手籍悉焚置不問八月下詔親征方駐蹕良鄉守仁捷書至且慮有沿途竊發欲自獻俘闕下疏略曰臣于告變之際選將集兵振揚威武先收省城虛其巢穴繼戰鄱湖擊其情歸今宸濠已擒逆黨已獲從賊已掃閩廣赴調軍士已散地方驚擾之民已定竊惟宸濠發謀之始逆料大駕必將親征先于沿途伏有姦黨期爲博浪荆軻之謀今逆不旋踵遂已成擒法宜解赴闕門式昭天討然欲付之部下各官誠恐潛布之徒乘隙竊發或虞意外臣死有餘憾矣蓋時事方艱賊雖擒亂未已也奏入上屢檄止之令以俾候車駕至大學士梁儲蔣冕屢請回鑾不聽九月上至南京守仁發南昌將獻俘闕下張忠江彬等謂當縱之鄱湖俟上親與遇戰而後奏凱論

功屢遣人至廣信止之守仁不得已乘夜過玉山械繫宸濠等取道由浙河以進張永已候于杭州守仁以宸濠付永還江西命守仁爲江西巡撫擢伍文定爲江西按察司邢珣爲布政司右叅政十一月張忠許泰劉暉等復營內旨領京邊軍討宸濠餘黨江西騷然不勝其擾

撫州志云知府陳槐集義旅討宸濠東鄉餘賊復起流劫州縣金谿典史李鳳禦之爲賊所害殺官兵三百餘人

十五年

庚辰

秋九月上以大將軍鈞帖令巡撫江西都御史王

守仁重上捷書守仁節略前奏入江彬張忠等姓名疏上始議北旋冬十二月賜宸濠死燔其尸餘黨至京師磔誅之獨抑守仁功未叙

明史紀事

十六年

辛巳三月武宗崩

夏六月贈故巡撫江西副都御史孫燧禮

部尚書諡忠烈按察副使許達副都御史諡忠節建旌忠

祠于南昌冬十一月封王守仁新建伯

豫章書

守仁傳云前後平賊率歸功王瓊大學士楊廷和不喜大臣亦多忌其功會有言國哀未畢不宜舉宴行賞者因拜守仁南京兵部尚書辭不赴已論功封特進光祿大夫柱國新建伯世襲歲祿一千石然不予鐵券歲祿亦不給諸同事有功者惟吉安守伍文定至大官當上賞其他皆名示遷而陰絀之守仁不自安時已丁父憂屢疏辭爵乞錄諸臣功咸報寢

世宗嘉靖元年

壬午

夏五月復設兵備副使于饒州秋九月遣

婁星等

宸濠妃婁氏族

戍邊

同上

三年

甲申

九江盜起殺傷官軍彭汝實疏言操江伍文定不即

議勦應城伯孫鉞擁兵不出俱宜切責從之

明書列傳

五年^{丁亥}春正月都御史潘希曾令贛州府通判董鳴鳳指揮

劉鏜等合兵討泃頭賊曾惟德王尚琦譚崇尚李正璉等

失利復命同知伍佐指揮姚璽統兵繼之又檄都指揮吳

山陳鑒協力進勦戰于龍南太平保中泃等處擒賊首曾

惟德鬼吹角等一百七十名追至曲潭及九連山奪回被

擄官員董鳴鳳擒斬賊徒四十名各賊潛竄二省

江西大

志

七年^{戊子}冬十一月新建伯王守仁卒於南安

明書本紀

八年^{己丑}春正月革新建伯王守仁世爵卹典

桂萼忌也

冬十一

月從南贛都御史周用言以吉安之泰和萬安龍泉永豐

永寧撫州之樂安屬虔臺

豫章書

十一年

壬辰

安福土寇彭正猖獗據洋澤道士嶺石巢銅坑茶

坪雞子寨等處叅政范永鑿督兵討平之添設同知鎮守

其地尋革

吉安郡紀

十四年^{乙未}分巡湖西道周相攝南贛道事延途告安遠杜柏

者日以百數相至贛聞柏恣橫不可捕乃佯曰柏富招怨

耳碎其狀衆憤走控三院冀得轉于相柏詞知告者姓名

日撥百餘人抄殺之有孫宏者懼抄及聚族千丁自保其

姻葉天序亦糾族丁千人助之潛告于相相諭曰過端午

出巡爲若等理積訟宏天序歸途懼柏邀殺急投黃鄉保

曾婆曾令十頭目領三千人合宏天序之衆爲一大寨曾

婆者舊所稱滿總葉芳妻也夫死代領其衆柏上變告孫

宏葉天序合黃鄉保賊反軍門信之發兵千三百令四指

揮領赴道聽調度討宏等相親書密揭軍門白宏天序不
 反反者杜柏也絕不使吏人知又陽戒四指揮宣言曰柏
 實罪魁宏等何辜相故歎息曰如軍門之令何吏人潛告
 柏遂弛備相發南康至安遠乃大閱差千戶五各領旗牌
 一押孫宏西去里許聽理一押葉天序東去里許聽理一
 押滿總十頭目兵歸黃鄉保一同典史疾馳安遠諭新民
 出城押歸原耕住處一選帶素與柏厚者數人諭之赴理
 五旗牌一時齊發柏計窮來伏庭下相曰爾既來須集眾
 庭鞫之械宏天序送鎮撫司監候而密具舟五十艘分載
 諸兵將畢忽執二犯乘夜順流歸贛柏黨千人馳至信豐
 聞柏已縛去各散歸遂反接柏及黃金瑋與惡僕杜龍杜
 虎獻俘軍門會新道至亟杖殺四凶然後行贛州兵寇志

張尚瑗辨正云孫宏所投黃鄉保曾婆謝志以為滿總葉
 庭椿妻夫死子幼代領其眾而薛副使甲所殪賊又即廷
 椿相距七年豈李順不死儂志高尚在乎前正德四年周
 文化招降程鄉賊何積玉已而復叛知縣蔡夔擒捕之安
 插餘黨葉芳等謂之新民芳自號滿總則是芳死而其妻
 曾婆代曾婆死而芳之兄復彼猖也

十五年丙申冬十月以建德萬安等縣分隸饒九贛三兵備建德

新建進賢星子都昌五縣俱隸饒州兵備建昌寧州武寧
 靖安奉新五州縣俱隸九江兵備萬安龍泉永豐廣昌新
 城南豐六縣俱隸贛州兵備設巡湖都指揮于都昌豫章書

贛志云十五年設坐營參將于贛州專司團練

十六年丁酉秋八月南贛提督王浚請留鹽稅銀以濟安南軍

興冬十月從王浚議復設南贛各縣捕盜主簿同上

十八年己亥流賊劉松一等六十餘衆劫掠瑞金縣陳畚諸處知縣王鈇率義勇兵快擒之明年團溪山賊首劉操等劫掠寧都瑞金二縣鈇督兵生擒劉操等三十餘名解赴軍門江西大志

十九年庚子秋八月浮梁大水景德鎮饑民亂巡撫王暉尋撫定之豫章書

按汪栢上王巡撫書云浮梁今歲不幸大水驟至繼以樂平遊民之禍又百七十年所無幸賊專意于景德鎮鎮之人衆足以相當又據險寨賊戰不利知上司來逡巡去耳據此則倡亂者係樂平人豫章書又云辛丑六月樂平浮梁饑民讎殺考辛丑三月巡撫王暉已內陞所載似未核實也

二十一年壬寅安遠黃鄉保新民葉廷椿作亂黃鄉離安遠縣治二百里與廣東平遠和平龍川等處接壤中有大帽山綿亘數百里久為盜窟有葉芳者自程鄉入衆七千自號滿總處撫王守仁嘗用以平桶岡洲頭後驕橫不受約束芳死兄廷椿領其衆肆暴尤甚副使薛甲計擒之并其二子選葉金為千長以撫其衆處撫虞守愚請于田背築城堡設巡檢司移安遠隄備之兵駐扎其地又於長沙營羊角水堡築城防守贛州兵寇志

豫章書云壬寅十二月廣賊蔡子顯等寇贛州殺指揮斯邦爵斯泰子主簿蔡思賢

二十二年癸卯冬十二月雩都官兵捕獲葉珊廖涯等二十餘名龍南官兵獲陳英等四十三名逋寇漸次削平江西大

志

三十年^{辛亥}冬十一月和平岑岡賊李文彪稱亂都御史張烜討之高砂千總陳貴爵與賊通漏師賊襲執指揮金爵及戰貴爵為外應遂敗明年遣指揮謝勅諭降賊乃殺貌似文彪者以紿之撤兵後偵知其偽復遣勅入巢切責乃殺貴爵而文彪竟得逃死 明書

三十四年^{乙卯}冬十二月四川酉陽兵 時調赴南直浙江 道經九江殺

江西鎮撫曲禮 豫章書

三十六年^{丁巳}春三月龍南賊賴清規據下歷保以叛清規本平民素有機智嘗從征三泖有功後充本縣老人郡倖署縣事索賄不厭因逃匿踪跡之愈急聚眾拒捕遂反龍南之橫岡信豐之員魚逕腦安遠之大小石伯洪俱為所脅

合岑岡賊李文彪高砂賊謝允樟號三巢而清規為雄嘯

聚十年地方受其荼毒 明書

江冕守南豐記云丁巳十一月閩廣流寇起薄寧化縣警報南豐時臨川令林潤奉御史臺牒查盤到縣因籍城中丁壯分門防守賊逼城下凡七晝夜乃遁去前後射殺賊首二人殺旗頭三人徒黨被矢石傷殘者無算夜劫營奪大旗一口飛火燒旗三口得所遺牲口什物甚多

三十八年^{己未}春岑岡賊李文彪合下歷高砂汶龍等巢出劫 定南紀事

三十九年^{庚申}秋八月設興安縣先是廣信弋陽縣橫峰窰鎮乃外省人民及處州礦徒流寓雜居屢為梗擾後設立府館添注捕盜通判以制馭之然不過往來駐劄而了巖寨

巡檢司又無能為歲饑缺食爭奪幾成大患御史沈越檄廣信檢校管景往勘之景乃宣布盛德作勸善懲惡箴以示之盜率悔過散去時縣民王庸等議開設縣治欲割上饒十里鉛山二里并弋陽十里設為一縣越因上疏詔部議未果行至是撫臣何遷復以為請從之

豫章書

零都志云嘉靖庚申流寇自閩入境以初夜發自會昌峽意深更必抵城下會過良蓬灘失利比抵邑向曉矣舟至東門岸上人鼓譟禦之保伍易懷灌乍發矢斃其張赤幟者賊氣大奪乃不敢窺城趨興國入吉安界

四十年

辛酉

饒平賊張璉故為斗庫侵欺桂法遂以失計良家

子稱亂閩廣諸巢賊附之夏五月流入興國自龍沙出梁口萬安及泰和殺副使汪一中執參議王應時遠過衣錦

鄉長信里溫陂等處焚劫一空新撫陸穩遣安遠知縣石廩領黃鄉葉槐等兵禦之擒斬數十人賊敗走出境

明書

豫章書云辛酉四月程鄉賊寇泰和官兵敗於馬纓岡殺三百餘人巡檢劉茂被執賊剖其腹副使汪祭之以文閏五月賊復寇泰和殺副使汪一中及武弁三人官兵三百餘人執參議王應時尋脫歸八月廣賊復寇江西十月兵部尚書楊博言江西之寇始于南贛賊巢合廣西叛兵益以本鄉惡少遂至蔓延前奉詔督責諸臣以九月報平今且過期不效請更申飭仍照邊方事例半月一馳奏賊情又御史段顧言生長邊陲素嫻韜略可就委以兵事海道副使譚綸嘗練土兵足稱智勇今以守制回籍宜令墨線效用以靖地方且閩廣之賊所倚重者數巢穴耳使以勁

兵乘虛搗瑕攻其必救賊必牽于內顧乃可平矣上令胡宗憲督率進剿餘如議行

李璣新設建撫叅將碑記云嘉靖辛酉巡撫胡松建三營于省城南豐萬安以爲諸郡鎮壓于兵備守巡諸道常駐之地各練千餘人以爲三營羽翼又請以署指揮僉事梁守愚陞建撫叅將以鉛山把總屬之統轄調度制曰可

南康紀事云賊張璉袁三等寇掠臨江等處調南康兵往征逾年賊復自閩入江西徑趨南康連舟而下南康兵追至黃婆磯縱火焚其戰艦斬首數十級諸酋長俱焚死南安事考云四月流寇入嶺劫大庾知府周鏜敗之

貴溪志云辛酉七月流賊袁三即袁鳳等破玉山順流而下掌縣事推官姚筐張軍備禦賊怖不敢入境十月閩廣流

賊從火燒嶺突入邑南岡湖山焚掠一月守道楊守魯以兵逐之至弋陽爲叅將戚繼光所殲

四十一年壬戌夏五月命都督僉事劉顯充總兵官鎮守廣東南贛叅將俞大猷副之一應戰守事宜會同督撫官協謀勦賊仍令江西紀功御史段顧言兼覈廣東功罪以聞世

宗實錄

歙水志林云四十一年奉詔會師二十萬分爲七哨大勦張璉兩廣兵駐潮州福建兵駐漳州江西兵駐建昌贛兵駐汀州監軍御史段顧言駐節贛城紀驗功級時督撫陸穩總江浙勁兵六萬屬叅將俞大猷將之璉出攻漳州諸帥乘虛搗巢璉急回自保大猷計誘賊黨郭玉鏡等賣璉以獻兩廣以饒固其地不肯予虔哨奪璉去璉旣擒諸巢

或勦或撫悉就平定

豫章書云六月廣東盜平南贛都御史陸穩巡撫江西侍郎胡松叅政譚綸等各賜銀幣有差十月函程鄉賊梁寧首至泰和懸示初張璉等平獨程鄉巨賊梁寧林朝曦徐東州等出沒贛吉二府久之不定穩遣大猷引兵夜襲寧巢寧懼先遁東州與官兵遇于武平伏發就擒朝曦復約河源賊首黃積山謀大舉官兵乘積山無備攻巢克之斬積山首朝曦率其黨從銀場坑間道出攻程鄉城知縣徐甫宰嚴兵待之乃計遣主簿梁惟棟招安說降其黨朝曦窮急棄巢遁追擒于陰那山并其弟朝敬等于是潮寇悉平十一月設南湖嘴守備鉛山長沙營羊角堡三把總

大志云四... 天流賊張忠洪都等由閩犯廣信委千戶

桑鳳守備鉛山分水關計擒巨寇百餘人論功陞賞

四十二年癸亥夏四月吳百朋為右僉都御史提督南贛五月

廣東僉事徐甫宰擒程鄉賊平之初上杭縣賊首萬鼎堯

等為官軍所擒其黨遁入程鄉賊温鑑梁道輝巢中鑑等

益強乃出巢窺江西平遠知縣王化擊敗之四十一年設平遠縣治于

程鄉縣之太平營隸江西贛川府趨瑞金遇嶺北道副使李佑兵三戰皆

敗奔歸程鄉故巢甫宰乘其營壘未定急攻之擒道輝于

大坑口擒鑑于沙羅塘豫章書

吳百朋傳云百朋以右僉都御史巡撫南贛汀漳與兩廣

提督吳桂芳討平程鄉賊葉丹樓又廣東大埔民藍松山

余大眷倡亂與香寮盜蘇阿普范繼祖連兵犯德安為都

指揮耿宗元所敗偽請撫百朋亦陽罷兵誘賊黨為內應

先後悉擒之惟三巢未下岑岡賊李文彪死子珍及江月照繼之益猖獗

四十三年甲子冬十一月平遠知縣王化擒田坑賊首梁國相

等于石子嶺國相本南韶故盜梁寧子先已請降至是復

叛約三圖賊葛鼎榮等分寇江閩二省化先其未發寄妻

子于會昌縣身自帥鄉兵擊之賊連敗乃縱反聞于會昌

城中言化已沒化妻計氏聞之遂自刎化追賊益急卒破

擒之撫臣以聞并上計氏守節狀同上

四十四年乙丑春三月賴清規等流劫信豐會昌安遠等處官

兵敗之冬十二月參將蔡汝蘭計誅逕腦賊鄧東湖兼程

四進兵盡屠其黨定南紀事

四十五年丙寅南贛提督吳百朋上疏請討三巢賊從

之世宗實錄

龍南紀事云丙寅夏六月都御史吳百朋親督參將蔡汝

蘭等官兵進勦下歷賊首賴清規伏誅先是百朋上疏討

賊知府黃宸請單騎招撫百朋佯許之清規意欲緩兵聞

府官來撫率眾稽顙待命開道送歸百朋乘賊懈亟移鎮

信豐檄兵備李佑督諸路兵于六月初二日分哨進攻長

沙營把總暴以平首破楊梅牌斷賊右臂逼賊巢賊戰皆

失利遂奪神仙嶺賊益促退保鐵爐坑同知李多祚督黃

鄉兵俘斬甚眾縱火焚其巢賊奔樟木嶺各路兵夾攻不

能支復奔入羊石鏡鉞清規率親信五六百人踞銅鼓嶂

嶂為龍川地昔儂智高所據為密穴者汝蘭選勁卒六千

人從間道圍守三寨自以大兵殿後又架天車為仰攻計

坐營都指揮王如澄冒矢石先登七月初四日破饒鉞寨
 初六日破銅鼓嶂清規計窮謀夜走葫蘆岡為隘兵所扼
 反走回苦竹嶂匿茂林中副將孔宗周偵知之領兵搜獲
 清規自殺戮其屍髮長七尺下歷平高砂謝允樟悔罪自
 縛詣軍門獻地乞為編戶乃即其地建定南縣事在隆慶三年
 穆宗隆慶二年戊辰春以張翀為右僉都御史巡撫南贛所部
 萬羊山跨湖廣福建廣東境故盜藪四方商民種藍其間
 至是盜出劫狎遣守備董龍勦之龍聲言搜山諸藍戶大
 恐盜因煽之嘯聚千餘人兵部令二鎮撫臣協議撫勦之
 宜久乃定 明書列傳

神宗萬曆二年

甲戌設建昌撫州二把總 豫章書

三年乙亥九月都御史江一麟知府葉夢熊計殲黃鄉保賊

葉楷等黃鄉寇盤踞有年四月內保民劉載永嚴順民等
 請增設縣治夢熊以告一麟曰是其眾可攜也乃先令子
 弟來郡塾就學以恩深結之楷怒其背已向官遂相讎殺
 又密致載永順民及尹明遂溫時選等數人假以把總銜
 俾為內應遣梁正環陳俊賴琪等予以招降旗數十免死
 粟三千懸賞格令伺便行事九月一麟乃發兵分四路叅
 將郭千東路入由勞田安遠知縣張行可西路入由太平
 保定南典史張尚禮南路入由大小石堡皆把截防其奔
 逸中路則贛通判徐廷輔及贛衛千戶孫韜李賓入自黃
 鄉雙橋搃賊巢正環等監立降旗眾星散無與官兵敵者
 楷勢孤走匿賴舍廟兵圍之火其廟遂焚死擒斬支黨葉
 盛文盛科吳富珠等俘獲家屬兒婦並黃織牙轎大白綾

旗諸違禁器物一麟奏捷疏聞叅政張士佩副使朱茹及
夢熊等叙賚有差明年立長寧縣贛州兵寇志

五年丁丑設寧州銅鼓石守備豫章書

大志云先是甲戌年賊渠李大鑿楊青山倡亂分寧據大
幽山金雞橋等處數征勦殺傷官兵民甚眾巡撫潘季馴
至遣守備鄧子龍密授方略一營萬載之黎源一營新昌
之黃岡一營奉新之百丈一營靖安之雙坑一營武寧之
黃竹又密令數十騎溷商賈中分伏楚疆以斷賊西路子
龍自督驍騎百餘人夜半入賊老營大瀉山賊弛備就枕
火礮四發皆驚潰斬首百顆焚死者尤多餘黨果趣黎源
洞遇伏兵次第就擒大鑿復走安鄉將以楚長河為援至
丁丑南昌知府王三錫知州石漢莅任申明保甲文武協

濟不旬月大鑿青山餘黨盡擒撫臣奏請增設城堡立守
備等官于大瀉山之銅鼓石為寧州外屏分定哨五營黎
源諸洞險盡在掌握可成內外應援長治之策

鄧子龍傳云萬曆初從大帥張元勳討平巨盜賴元爵已
從平陳金鶯羅紹清賊魁黃高暉逸子龍入山生獲之遷
銅鼓石守備尋擢署都指揮僉事

按季馴本傳萬曆四年夏巡撫江西明年冬召為刑部
右侍郎銅鼓石設守備營豫章書誤載四年今改正

八年庚辰夏六月龍川猴嶺賊鮑時秀叛知縣劉世懋立四隘
兵禦之定南紀事

三十年壬寅春二月饒州景德鎮民變稅監潘相舍人激之相
誣劾通判陳奇逮下獄明史紀事

三十二年甲辰劇盜陳上新大掠長寧知縣凌位詳請會勦追至大石堡鄉勇葉佳士擒之定南紀事

三十九年辛亥大盜林保壽劉和尚等劫掠大石堡邑生范繼純擒解軍門知縣洪有觀以武功旌賞同上

李應昇傳云萬曆末年九江南康間有柯陳二大族相傳陳友諒苗裔負強拒捕有司議兵之應昇時為南康推官單騎往

諭皆叩頭聽命出所匿罪人方以定熹宗天啟五年乙丑廣賊丁天勝高定南縣殺鄉民胡敬泉等

後二年廣賊鄒豺子復劫伯流保同上懷宗崇禎元年戊辰夏四月丁婆總蘇丁婆部囊計等賊數千攻安遠

城陷擄掠一空挾知縣沈堯封去邑紳富戶購銀贖歸五月復置城中有備環攻軍入焚城外民居去尋破定南下

歷執巡檢湯之訓殺修甚多復攻圍定南署縣事贛縣訓導嚴可象堅守不下把總董光同羊角營把總趙龍力戰

死贛州兵寇志二年己巳廣賊張庚子劫掠龍南境把總邵某同典史薛澄統

集千長徐崇廖尚美袁思唐等追勦至上蒙保伏發官兵被圍邵奮鬪死之并殺徐崇袁思唐及鄉兵百餘人龍南

紀事四年辛未廣賊鍾凌秀犯瑞金有僧守宗及江向吾率兵殺賊

數十焚其營賊遁去明年賊復過瑞金守宗向吾率義勇追之俱歿于陣丁壯死者百餘人贛州兵寇志

定南紀事云寇鍾三舍等犯縣知縣陳日炳統領機兵鄉

勇禦之三舍等一夕遁去

五年壬申夏四月湖廣流盜自興國州入江西泰和吉安等處
明史紀事

撫志云五年贛賊數百人從永豐入樂安崇仁宜黃多被
焚掠各鄉民兵禦之殺傷相當半月而遁

贛志云五年粵賊丁婆總流劫贛吉屬邑零都各鄉受禍
甚慘贛閩二撫遣將協勦追至泰和界賊就撫

九年丙子夏楚臨武山賊二百人晝入城行劫并掠鄉村次日
乃去 安福縣志

十年丁丑冬十一月臨藍流賊數千自楚陷萍鄉乘勝東下知
府解經達推官陳瓚先期告急時巡撫解學龍檄守道郭
必昌巡道王庭梅各以臨吉兵會自督兵三千為之後未
至賊抵城下掠附郭數十里城中拒守者半月謀獲賊內

應趙大春等斬之翼日省兵至因塘撥失悞遽深入反為
賊敗西北兩門雲梯並進會萍鄉知縣程之敦以失城乞
師于楚得辰兵五千人來援城始獲全 袁州府志

九江兵防志云十年流寇張獻忠猖獗陷蘄黃分掠江北
至德化鎮小池口遊擊張繩武率兵渡江禦之稍遏其鋒
後寇大至繩武兵寡無援力戰死

十一年戊寅春二月鉛山妖人張普微倡無為教聚眾起兵
其黨有江義周八等見 周清儁封山紀略衝弋貴界欲由上清抵建昌巡撫解學

龍檄守道林某推官吳鑄勦平之 廣信兵變志

新淦防圍志云是年以流賊充斥奉檄各縣添設義兵二
百名分左右哨

十五年壬午廣賊閻王總副刀總番天營豬婆總凡十餘種流

劫各縣村落明年攻破安遠及石城諸寨贛州兵寇志

靖安志云奉新李肅十肅七謀逆靖安劉丁九捕緝被殺遂嘯衆爲紅巾賊南昌府推官胡時亨率鄉勇殺賊首李陳陽等數百人乃就撫

浮梁志云壬午四月洪溪洞聚有饑民截船劫掠守備夏某捕之遇害邑生計再元率十五都鄉兵搗巢斬首百餘級活擒數十人患始息

十六年癸未秋八月張獻忠陷長沙降賊將尹先民何一德願効前驅進取江西獻忠悅僞封世襲伯九月賊前鋒至袁州獻忠至萍鄉知縣棄城走萍鄉士民牛酒遠迎賊賊陷萍鄉盡焚公廨屋廬空其城獻忠歸長沙分兵徇分宜十月賊陷萬載陷袁州左良玉遣副總吳學禮來援次于分

宜進圍袁州僞將邱仰寰拒守都司高山奮身先登斬賊二千四百奪馬六百擒斬仰寰復袁州時江西袁州吉安臨江人民多徙山谷官兵淫殺俘擄三郡苦之所在屯結以拒官軍巡撫郭都賢檄撤左兵回九江招土著以戍三郡官兵旣撤賊自長沙突至吉安兵備岳虞巒方閱軍于郊聞報潰走吉安諸縣同日陷賊設僞官改吉安爲親安府廬陵爲順民縣賊將張其在發僞檄馳下袁州兵民皆傾城先竄賊復入袁州良玉令馬進忠等將兵赴袁州十一月江督呂大器兵復吉安進忠等兵至分宜賊盡竄袁州進攻之賊開門西走追逐三十里復袁州盡誅諸僞官斬首三千級奪賊馬五百弓矢數萬是月設南贛兵三千以副總兵鄭鴻逵統之十二月獻忠遣兵陷建昌又陷撫

州南豐明年獻忠棄長沙入夔州 明史紀事

袁志云癸未秋萬載天井窩有奸民邱仰寰盧南陽等與獻賊應悉眾來攻知府霍子衡知縣朱茂暲嬰城告急巡撫郭都賢移鎮袁州聞賊至旋南昌吏民竄匿城遂空浹旬邱賊乃至左帥副將吳學禮督兵五千自潯來援賊遁班師又云十一月左帥鎮將馬進忠王允成等督兵再復袁州左兵淫殺百倍于寇宜春化北鄉林田石洞深邃廣闊居民避入洞內兵以火薰之死者千餘人分宜梁家坊居民避入毬嶺洞左兵亦以火薰死者八百餘人

饒州事考云癸未年鳳督馬士英調黔兵六百餘人由樂平往徽州統兵者以紀律不嚴人情洶洶咸疑為賊武生倪大顯等集邑民數千人圍黔兵于西門擊殺殆盡領兵

四姓劉姜謝李僅以身免事聞署篆同知鄔文明被劾去部議賠償馬價遍及通邑富民又云水師副將閩人鄭鴻達率兵造戰船于饒州經歲乃行

龍南紀事云十六年密教楊細徠以妖言惑眾細徠係定南何氏家奴流浪數載突歸自稱遇師指引今當彌勒下界謬以天翻地覆銅風鐵雨恐嚇愚民必入其教始得免劫立教堂于定南縣樟田密約于六月初一日齊赴龍華會至晚選精丁授以兵具詭云至下歷司踏勝地舉刃疾呼其城自崩至司試其術不驗營兵礮發傷數人眾悉奔潰細徠欲逃他鄉廖先弘黃時振計擒之巡道章自炳聞變馳至斬于西門示眾斬後雷隨擊之

左良玉傳云十六年正月良玉始去武昌時降將叛卒假

左軍號恣剽掠蘄州守將王允成爲亂首都御史李邦華
被召道湖口檄良玉以危詞動之令安慶巡撫發九江庫
銀十五萬兩補六月糧軍心乃定邦華入見論良玉潰兵
之故請歸罪于允成帝令良玉誅允成卒留軍中不誅也
良玉留安慶久之徐溯九江上獻忠破湖廣沉楚王于江
坐視不救八月乃入武昌招徠下流羸定命副將吳學禮
援袁州會賊陷吉州復陷袁州遣馬進忠往援時兵部侍
郎呂大器代侯恂爲總督恂解任中道逮下獄良玉以故
鞅鞅與大器齟齬賊連陷建昌諸府大器無兵不能救良
玉亦不援進忠與賊戰嘉魚再失利左軍遂不振

江西通志卷第三十三

武事五

國朝

世祖章皇帝順治二年配夏四月英王追闖賊至九江寧南侯

左良玉子夢庚率所部三十六營來降王北旋後營總兵
金聲桓請於王願收江省自効許之乃命闖部降將王體
忠合營屯潯規進取六月聲桓先遣牌招撫巡撫曠昭道
士民送款十九日聲桓入南昌南康九江不煩兵而下舊
撫標將白之裔鄧武泰駐袁吉以兵扼峽江湖東分巡道
王養正與布政夏萬亨建昌知府王域推官劉允浩南昌
推官史夏隆等輔益藩由起兵建昌聲桓令前營劉一鵬
禦峽江屬體忠備撫建七月體忠率兵下撫州趨建昌時

有保寧王者自河南來好談兵益藩倚信之通于體忠及
戰保寧從陣後以火箭傷象兵遂敗象兵從雲南至三日
城破益藩被執王養正等五人械至南昌殺之屬縣皆降
新昌知縣李翔與監軍張家玉邑紳徐伯昌共城守家玉
戰敗入閩城破翔與伯昌死之一鵬亦破峽江兵武泰死
之攻袁州守將胡纓兵潰署府事同知李時興自縊于萍
鄉官舍遂收吉安長驅至萬安知縣梁於溪死之巡撫曠
昭被執八月二十五日聲桓矯殺體忠以體忠部將王得
仁代是時永寧王慈炎一作由德復舉兵克撫建屯兵進賢糧
不繼退守撫州聲桓令得仁率兵攻城吏部文選司曾亨
應家臨汝捐貲聚眾歸永寧得仁夜率百騎潛至臨汝圍
其宅執亨應殺之永寧退保建昌得仁追獲焉楊陸榮三

藩記事本末

左良玉傳云監軍御史黃澍挾良玉勢面觸馬阮既返遣
緹騎逮澍良玉留不遣澍與諸將日以清君側為請亡何
有北來太子事用事者以為偽中外皆以為真澍借此激
眾以報已怨召三十六營大將與之盟良玉乃傳檄討馬
士英自漢口達蘄州列舟二百餘里而良玉疾已劇至九
江邀總督袁繼咸入舟中繼咸正辭拒之部將郝效忠陰
入城縱火殘其城而去良玉望城中火光曰予負袁公嘔
血數升是夜死子夢庚為留後偕黃澍以眾降于九江
楊廷麟傳云二年南都破江西諸郡所存者惟贛州九月
大兵屯泰和副將徐必達戰大敗廷麟自督師與劉同升乘
虛復吉安臨江十月

大兵攻吉安必達戰敗赴水死會廣東援兵至我師退屯峽江已而萬元吉至贛

饒州事考云二年秋

王師下江右郡人以城歸附故淮世子朱由桂焚宮殿遁入閩莫知所終

楊陸榮雜亂紀云乙酉六月金聲桓入南昌南九款附德

化李含初傾家起兵狼山連破德安瑞昌未幾含初所部

王拐子私款于我守潯將余世忠因襲狼山含初死之七

月德安郭賢操聚眾陷德安遂破建昌所部高長子款于

我執賢操以獻時方議撫釋弗殺後于五年殺之南昌舉人胡海

定與德興之海川董氏謀起兵十月

大兵取婺源海川兵絕我糧道復攻婺源殺我所置富費

大兵破海川諸營海定被執及董正經俱殺之新昌副都陳

泰來遣所部李凌虹提兵入萬載殺我所置令杜章卿連

破新昌十二月遣子正議正儼往他省自帥師東下聲桓

使署驛傳道戴國士招泰來而以大軍隨其後泰來出見

國士不及設備兵敗死黃氏祠中其骨燼焉

易學實贛州乙丙紀略云六月廣寇閻羅總自寒信峽渡

水營車頭守將林宗往撫之為賊所殺

二年丙戌春三月我兵破寧州監軍許文龍死之初聲桓遣人

招文龍不從率民逐我所置官吏屯兵奉鄉聲桓乘間破

寧州遂攻奉鄉圍守三月文龍糧絕乃走保界首砦食盡

被擒是月吉安守將胡長蔭為我將柯永盛所敗元吉失

吉安退保贛州夏四月破廣信先是黃道周督兵出江西

道周于乙酉十二月至婺源為我師所獲詹兆恒以兵侍協守廣信御史周定

仍以右僉都巡撫其地得仁破安仁貴溪定仍督副總姜

天衢戰連湖我兵小却已戰小箬渡及河口遂大捷城破

定仍自縊死兆恒奔懷玉山復糾眾攻衢之開化兵敗沒

于陣五月江撫劉廣胤督張琮來援贛州戰于梅林而敗

龍武新軍亦敗即廷麟所招四營峒寇也元吉謀練土著更番出戰我

師移下沙秋七月各路援兵至皆欲戰元吉欲俟水軍王

其竄謂元吉曰水帥羅明受海盜也桀驁難制且今水涸

舟行為難豈能如約不聽八月

大兵聞水師將至即令軍士夜截諸江焚巨舟八十明受遁

於是諸營皆散去元吉弟六吉調廣西狼兵八千至南安

亦不戰而潰已聞唐藩死汀州全城氣索冬十月天霧雨

雪我師乘夜上城城破元吉率士巷戰奪門出投貢江而

死廷麟死于清水塘同上

袁志云先是楚帥黃朝宣自燕子窩督兵數萬來攻袁于

城西鳳凰山築土城開濠為持久計進逼北城是年正月

金聲桓遣副將白之裔來援朝宣解圍去五月領將郭天

才拆民屋置甕城增修敵樓

贛志云四營頭賊據信豐伯石保約長黃一爵率鄉兵擊

之殺渠魁文都冬十月賊復據新田平地山明年丁亥正

月一爵率鄉勇從石門逕入搗其巢溪水皆赤

龍南紀事云南埠葉之春招兵號南營奉調勦蘇溪叛人

遂驕悍不受節制因憤楊坊鄉兵誤殺葉賡廷糾眾萬餘

報仇攻彈子寨脅和乃解後由南安至黃荆高樓遇

江西通志 卷三十三 四
大兵殲之其同族葉南芝亦糾衆數千至南安率隊逃回

雜亂紀云丙戌八月福州既破原任檢討傅鼎銓往寧都借兵于田海忠不應因集鄉勇破宜黃駐兵樂安原任福寧知州揭重熙聞

王師入閩提兵援福州又聞唐王赴贛州倍道趨贛爲我兵掩擊大潰收散卒攻破撫州中軍洪深沒于陣兵士僅存千人退次王洞

四年冬十一月徽寇吳惇信王紘嘉等哨聚樂平浮梁婺源縣界婺寇吳良臣及程琦程陽等各聚衆至數千人破城郭掠居民官軍討平之 饒州事考

浮梁志云順治四年十月土賊破城知縣李秀龍遁往景德鎮副總湯執中復城後攜兵搜勦東鄉土賊又自北路來破縣駐城三日焚燬殆盡執中自東鄉撤兵回與賊遇于東路大橋頭斬首千餘級

龍南紀事云四年黃沙劉耀中反耀中本楊細徠徒漏誅附閩寇仍聚密教徒衆列幟據寨二月知縣呂應夏往撫不就調通縣鄉兵圍勦之耀中求救于閩寇十二月閩寇數百突衝義勇營柵殺紳衿兵民百數十人應夏僅以身免贛撫劉武元總兵柯永盛遣兵討平之又南埠葉南芝因滋陽王妃攜一幼子流入南埠南芝率衆以王禮事之留居梅子寨通廣寇馮高鳴共相佐護其族葉啟鳳詣縣告變賊誘殺之永盛調副總孔國治等搗巢執王妃母子及南芝解贛城殺之

長寧志云粵寇謝志良糾黨數萬圍城月餘知縣錢奇嗣

率十營士兵乘賊持久氣怠出城擊破之

雜亂紀云四年王得仁下令族瀘溪丁傳魏三姓

以貢生魏一柱

曾縛署縣事李光送鄭彩所也一柱棄妻子走閩襲破將樂聯結永西德

化興安諸藩攻克建寧

王師圍之五閱月始破一柱與諸藩俱死惟興安先出得免

五年戊子春正月金聲桓王得仁據南昌反饒州守將潘永禧

以城應之同上

袁志云金聲桓叛遣鎮將湯執中蓋遇時及自號義旗者

分路郡城互相吞併五月執中南下十月遇時西奔袁城

復空十一月三關棚賊率眾據城明年正月城復

贛志云先是萬元吉未敗時嘗以書招聲桓聲桓頗心動

陽繫致書者于獄夜半釋縛勞問元吉起居而遣之及

王師破贛元吉死聲桓肉不自安會信豐諸生曹兌光從閩

來妄言唐藩在平遠之五子若聲桓狐疑得仁以勢迫之

遂以戊子正月反二月得仁陷九江聲桓召還與議所向

得仁欲趨金陵聲桓客黃人龍曰贛居上游文武督鎮在

焉此腹心患也宸濠之事可鑒矣聲桓然之決計南攻贛

州都督高進庫等與戰不利堅守以挫其鋒聲桓乃檄得

仁悉力攻贛自引軍踰嶺陷南雄韶州邀粵將李成棟同

叛成棟從之時明桂王由榔擅號廣西而江廣合從殘燼

幾乎復熾賴贛以孤城亘其中

王師得再克捷四月固山譚泰自饒州統兵攻南昌九江偏

師亦來會聲桓得仁先後引退贛兵追擊之得仁大敗九

月成棟將兵救聲桓自南雄出官兵敗其前鋒成棟陷信

豐盤桓不敢進又云興國煙兵蕭國忠姚章甫糾眾倡亂繼起者為劉霖寰及王大勇宋朝宗等我兵前至興國誅姚章甫以柴震龍知縣事戊子聲桓反南昌大勇朝宗乘機率眾殺震龍及典史武尚仁焚劫官民署舍贛營將號李捍刀者領軍來討大勇等戰敗官軍圍于梅窖國忠死眾推霖寰為主後為大勇所殺大勇朝宗分屯諸砦聲桓得仁提重兵寇贛相持四月官軍還自救不能討定聲桓遣田廣業知石城逐知縣劉世禎廣賊黃昌復駐石城黃徽印據通天寨久之乃去又土賊曾斌羅聚奎等烏合亡命窺雩都至南岸將渡江會官兵駐雩郊外舉砲斃賊旗手賊氣奪回保和豐時有蜚語誣城中與賊通者推官蘇峻大適從寧都過雩廉得情實白諸巡撫因遣飛騎止鎮將勿妄

誅良民後曾斌等為土人漸次捕殺又閩寇圍龍南城自

六月至九月城破殺知縣呂應夏食盡乃拔營去

九江志云王得仁攻九江總兵冷允登知府吳士奇知縣

劉敬修皆降遂以偽將吳高鎮之四月大將軍來討高逃

去

廣信志云五年春省叛餘黨王紹忠陷鉛山踞城至八月

趙洪恢復

三藩記事云聲桓以南昌叛首迎揭重熙傅鼎銓而兩人

不欲駐省請任閩事我譚固山圍南昌重熙赴粵求援鼎

銓兼督兩軍與張自盛合營戰敗于三江口龍泉進士劉

士植令子肇履募兵從劉一鵬圍贛州令季子穉升趨南

維金王敗歸匿龍泉郡守索之急絕粒死穉升後戰死長

橋舖星子諸生吳江募衆應聲桓我師再平江州歸南康
爲拒湖計結壘開先寺敗走都昌與舊鎮張士彥標將黃
才兵合後黃才歛于我執江來獻殺之

六年^已春正月南昌破金聲桓王得仁伏誅三月固山譚泰
及撫標中軍楊遇明兵臨信豐李成棟縱兵焚掠出城渡
河溺死大軍屠信豐八月贛撫劉武元以守備李若垠署
興國縣事與副將鮑虎提兵至擊宋朝宗于龍下縛而沉
諸水王大勇謀襲城若垠知之伏兵于鳳凰莊之松林大
勇遇伏戰敗走匿贛撫招之出降爲其戚孫可貴所殺部
曲復殺可貴餘孽悉平

贛州兵寇志

徐世溥江變紀略云戊子正月巡撫章于天率內丁數十
騎如瑞州王得仁脅金聲桓反七門不啟絞殺巡按董成

學湖西守道成大業遣人邀擒章于天於江中迎南都舊
輔姜曰廣于浣湖里第出示安民稱隆武四年聲桓稱豫
國公得仁稱建武侯以宋奎光爲左軍都督府都督僉事
黃人龍爲總督五省兵部侍郎劉一鵬爲漢城侯得仁婦
弟黃天雷爲兵部侍郎錦衣衛同知金幕書記吳尊周爲
巡按江西監察御史王幕書記陳芳爲巡撫江西僉都御
史司道府縣各屬堂佐皆其客也倉卒求冠帶不得盡取
之優伶箱中兩人微聞唐王已死諸臣擁立桂藩于廣東
即詐爲隆武禪詔進諸秩有差告示文移更署永曆二年
然聲桓意終疑又謀求益藩子立爲世子以監國其舉動
如此聲桓聽人龍議欲先取贛又忌王氏專制會城脅與
俱往三月丙辰乃出師都督高進庫城守相持七十餘日

四月二十八日九江破報至會城內外皆走五月七日七
百騎至石頭傳為鮑瑞玉兵又曰九江裨將吳高敗兵明
日兩岸哭聲鐵騎滿西山矣聲桓兄金成功約降奎光聞
而殺之王營裨將貢鰲以其軍降斬關竟出黃天雷未之
知也報至贛州聲桓大恐撤兵還十五日前隊至生米十
九日金王大隊至接戰獲大砲三聲桓有驕色遂勒兵入
城六月三日得仁悉其精兵攻壘大敗于七里街後竟城
守莫敢出大將軍固山額真譚泰乃行營掘濠溝東自王
家渡屬灌城西自雞籠山及生米盡驅所擄丁壯老弱掘
濠負土率深二丈餘廣如之又役俘擄為浮橋章江自東
及西廣袤七里上起文家坊下至楊子洲凡為橋三固山
額真營蒲子塘離永和門六七里于門東二里築臺高丈

餘登望城中獨留惠民門濠側數十丈不圍藉以俘獲并
廉城中情狀吳尊周託請廣兵而去所遣購米運硝黃芻
油先後數百艘皆為官兵橫江夾擊水遮陸截無一人還
報者而得仁方娶武都司女為繼室酒荒日甚聲桓面色
如土嘆恨而已城中斗米至一金宋奎光憂之勸背城一
戰金王終不從有狂僧曰摩訶般惹聲桓拜為國師後覺
其詐磔之并殺章于天解姜太保印更以文武兵餉事聽
全鳴時指揮城中米至六百金一石人相食譚固山知轉
餉路絕因得以從容西南逐張啟祚西北降鄧雲龍而殺
五千歲議北勦余應桂吳江于都昌東收湖盜涂麟三西
破丁家塘土砦餘什伯為聚未成者林亮殷國楨輩次第
擒殺胡澹病隔噎死其二子亦擒斬然王氏火器精悍且

多全鳴時亦能軍善守故前後相持至八閱月副將楊國柱私降江南運紅衣大砲至己丑正月十九日盡力攻城聲聞百餘里山谷皆震亭午城始破聲桓衣其銀甲寶鉞赴帥府荷池死得仁突圍至德勝門兵塞不能前三出三入擊殺數百人被執支解奎光城破後二日得于城西空舍擒見固山諭之降不食乃殺之陳芳黃人龍皆死亂兵中姜曰廣儒冠死于僕家池餘兵以次降走矣

三藩紀事云揭重熙至肇慶永明令總督江西兵未及歸而南昌破沿途召募遇我兵大敗于程鄉監軍桂泓陣歿重熙身中三矢僅免金王故將張自盛洪國玉等聞重熙出湖東爭來歸兵大集駐寧都石城間傅鼎銓被召不願往請再舉終江事

饒州事考云六年二月副將穆生輝復饒州

定南紀事云正月廣賊陳鳳廖九發張赤鬚楊大總等攻圍定南縣城以謝卜清為內應城陷知縣曹邦偉死之其子亦為賊殺明年鳳復犯縣署縣王廷彥率鄉勇退之

七年庚寅劉京蓋遇時魏林鳳等金王潛掠永寧泰和永新諸縣參將任仲良羅映培勦之吉安郡紀

贛志云二月官軍薄寧都彭慶順降慶順前聚眾殺官為亂兵所殺時瑞金劇盜釋超忠據銅鉢山陳其綸據大柏地勢若輔車知縣錢江計誘超忠縛之以怵其綸其綸陽聽命橫行如故復有粵寇許勝可合閩寇劉芳羅承俊等據羅漢巖其勢張甚

八年辛卯秋八月傅鼎銓至廣信張村為我守將所執江撫夏

一諤諭降不應殺之張自盛踞大覺巖掠邵武戰敗被執
揭重熙率數十人赴曹大鎬于百丈磔時大鎬還我兵圍

之射重熙中項執至建寧十一月三日殺于南街市口未

幾大鎬亦敗都昌督師余應桂為我潯帥楊捷所執其子

顯臨俱死 三藩紀事

贛志云寧都黃村寇郭達伯勇銳善戰孔國治鮑虎皆為

所敗既就撫至是復叛官軍不能克其冬達伯與部下十

七人逐官軍于大瀦塘被圍數十重矢中其要害偽死官

軍取其首躍起殺數十人如是者三乃自刎

九年壬辰春正月劇盜何子才焚掠餘干西南鄙殺留本塘艾

姓一族殆盡各鄉聯集都綱自為戰守至次年盜始息 饒

州事考

廣信兵變志云九年閩賊熊應池踞桐木源為亂後三省

會勦始降之

十年癸巳番天營賊流劫安遠境長沙營孔田各寨擄掠男婦

千餘副將賈熊平之廣東六坊賊李時戴等襲劫定南署

典史蔡國相力戰被殺 贛州兵寇志

十一年甲午秋瑞金知縣錢江請於贛撫宜永貴發兵圍許可

勝擊擒之并誅閩寇明年進兵攻陳其綸敗而逸鄉勇斬

其首以獻瑞賊悉平 同上

十三年丙申春二月興國縣梅窖洞賊曾拱辰曾象吾曾玉華

劉元谷等劫略永豐萬安泰和雩都諸縣又與青塘賊何

輝明插血為約梅窖洞周圍高山巖穴相連諸賊分踞洞

口築土墻起瓦樓開砲眼圍外深坑洿池環繞官兵無可

站脚遊擊洪起元左雲龍攻之不能破因發大砲四位多造竹篾盛土并運大石填平施放大砲燒燬角樓賊始敗退拒峒口起元雲龍偵知賊峒深險曲折容四五千入峒內活水長流積穀甚多用長圍遏賊出入門路嚴巡邏以防奔突困守數月乃就斃佟國器撫虔疏略

十六年己亥秋七月樂平盜首王觀祖哨聚四百餘人入城殺

典史沈大林守將張文惠追觀祖至接竹渡生擒之餘黨

皆戮饒州事考

贛志云是歲八月平雩都劇寇李玉廷王廷廣東人集眾據佛婆里老虎山小莊等處肆行劫掠贛撫劉武元發兵勦捕王廷率眾降既而復叛贛撫佟國器遣兵進勦王廷踞龍溪山官兵攻圍數月未能克賊復劫雩之水頭崇賢

安平長樂佛婆安仁青塘坎田八里新撫蘇弘祖進討

其驍賊張寧等數十人王廷勢促逃匿明年春獲之九山

田舍梟首軍門賊眾平

靖安雜志云己亥三月盧洪十倡亂華坊坪其黨千餘行

劫村市知縣屠尚參將張允重領兵進勦渠魁就殲九月

周家埠潛良四聚眾攻掠縣城殺傷典史時傑守將李得

功適因霜降操兵尋即勦獲

浮梁志云八月土賊破城尋復之副總孔某提兵勦撫九

月北鄉陳九思率眾投誠

十八年辛丑夏五月建昌知府高天爵勦殺滴水砦城首蕭來

等齊王又破羊石砦生擒幸連升蕭來信番天王等三十九

六月班師奏凱何三省平砦紀

祖仁皇帝康熙八年酉配廷議分布安插閩漳投誠海寇遣海澄公標下都督總兵許貞屯田于贛縣蔡璋屯田于興國縣潯水志林

九年庚戌春二月獲巨盜王跳鬼先是已亥年浮梁盜程光等就撫尋以他事下獄八月聞海警越獄出光死跳鬼遂為

渠魁行劫徽池一帶兩江總督麻勒吉遣舊帥邱越統兵勦捕跳鬼匿婺源深山鄉勇搜獲之其黨悉平浮梁志異

十一年壬子流賊周海元聚眾作亂散布偽劄由廣東平遠流入長寧安遠境內旋逼會昌羊角水會兵進勦逃于武平盤龍隘擒斬之贛州兵寇志

十三年甲寅春三月耿逆告警廣信城守副將柯昇於四月二十四日挾標下兵目反奪城出由永豐至二渡關駐扎五

月昇遣將分路圍城知府高夢說同知侯七乘突圍奔省府屬七邑俱為賊踞廣信兵變志

饒州事考云七月城守參將程鳳反先是萬年失守訛言閩寇即日臨城是月十五夜鳳部目兵十九人露刃劫鳳

以叛比明城外寂無應者遂棄城遁把總陳虎馳往浮梁勒守備王憲從逆即座間縛知縣王臨元奪印劫庫臨元

自縊時七月二十二日也程鳳逃至浮北麻村密招集積盜勢漸張九月閩賊及信賊數萬屯景德鎮掠物一空十

一月王憲遁走他盜殺之于婺源界偽總兵宋啟運駐扎景德鎮率領諸賊是月巴額二將軍統滿漢官兵自徽州擊

敗偽羅都督殺數萬人轉鬪而前克樂平城賊眾聞之遁去遂復饒州賊黨朱統錫逃據餘干索餉散劄村落為墟

後于廣信山中被獲殺之

撫州兵氛志云逆藩耿精忠踞閩叛遣偽將易明攻撫州城守遊擊楊玉泰守備王士質從逆七月城陷土賊乘間盤踞各邑金谿知縣白琬如迎降崇仁知縣陳潛棄逃宜黃署縣事縣丞劉揚俊脅從樂平知縣郭肇基被害東鄉知縣汪士奇臨川知縣邱泰隨知府王永茂請兵南昌九月正黃旗將軍希爾根鑲黃旗將軍哈爾哈齊正紅旗將軍舒恕統禁旅分路勦撫城池先後恢復又臨川志云閩寇楊進等內潰逃奔建昌府城建昌先為賊破十月楊進復統眾突至千金陂我兵迎擊進軍善用火箭鋒甚銳因身披重鎧轉戰不利墮水死賊眾奔潰

康熙紀事云叅將柯昇程鳳相繼叛隨有朱統錫李標等

為寇八月破都昌據之遂窺南康知府倫品卓以城守無備請兵會城十月十三日賊乘虛陷南康土自吳鎮豬溪下至青山舟楫蔽湖焚劫連晝夜十九傍晚尼將軍從楚進廣兵過圓通總督董衛國密咨移師撲勦星子檄品卓赴軍前二十一日三鼓奪隘口分兩翼直搗城下殺賊無算賊遂奔回都昌時以都昌從賊者眾將屠之品卓力陳可離其際迫脅單騎至縣撫安之是年冬寧武奉訪賊首劉往七戴朝曉等突陷建昌蹂躪安義黃野夫劉安谷贛州兵寇志云是歲海上遺孽鄭錦擁眾窺漳泉屯將多鄭氏舊部與之通五月石昭于所屯處陳屋園先發張治朱明墾江背峒者領眾尤盛六月贛遊擊吳某統兵勦昭朱明率眾助戰興國典史錢志泗饋軍被殺兵隸盡殲屯

將蔡璋誘石昭誅之八月張治率江背峒數千人圍城城上發大礮擊賊始退踞埧南會把總李邦祿從總鎮擊破大白帝賊還獲賊旗數十十九日距興國城數里令兵皆持白旗賊望之以爲援也邦祿出不意奮擊城中兵夾攻賊大敗退據崖石鯉公鯉婆樟石等砦黃捷先據寶石砦又有乾田黃泥割牛銅鑼及零都之雲霄鷓鴣搖藍等十三砦又去五月粵賊王九萬林青袍寇會昌湘鄉攻破山寨及蕭帝巖屠掠甚慘八月攻左右水扎中村羊角營守備杜應元把總馮古孝等領兵督各寨鄉勇進勦戰敗十一月攻羊角水堡十三日攻會昌知縣王凝命率民登陣固守贛撫曲色純總鎮劉進寶遣遊擊李天柱周球等領兵援勦賊夜遁又寧都曾若千導耿逆兵陷石城六月進攻寧都閩寇王甯二隊先至屯河東坊營將劉體君與戰知縣宋必達使鄉勇佐之寇敗郡將許盛周球自贛至圍始解又賊首吳十八等于五月圍石城三日解去六月閩榴珠坑賊黃佛勾引汀州賈賊逼城與吳十八合圍三日城陷旬餘趨寧都會虔鎮劉進寶遣遊擊許盛率兵來援賊遁七月朔城中盡逃因委贛府照磨李德明署縣事八月建寧賊甯早復圍城旬有七日寧都中軍管天祥率兵來援賊棄城遁

南安事攷云上猶流寓廣人余賢何興聚衆石溪洞殺掠營前等處流劫四邑

宜春武勲志云四月棚寇猖獗六月總兵趙應奎遣守備陳素綸等進勦三關九圖陣斬賊首朱益吾朱翰苑生擒

賊首李念松李瞻我九月賊破萬載城餘黨分踞善和鄉
荆橋等處十月應奎親統兵會同穆都統往荆橋撲勦偽
總兵左宗榜陣斬五百餘級恢復萬載縣擒賊首邱以祥
偽知縣童聖功十一月棚寇引偽總兵黃乃忠等由西村
逼郡城官軍堵截敗之檄防萬遊擊陳素綸撲勦餘賊陣
斬偽監軍道盧景岱賊將漆國勲擒偽守備李忠
新昌兵防志云十月棚寇朱永勝由萬載攻新昌城陷十
一月撫標右營遊擊佟國棟恢復是月復陷

萬安災變志云閩廣流寓屯黨乘楚寇糾眾數萬陷城守
備鄧雄乞師贛撫城乃復
黃贄殉戰紀事云甲寅五月耿逆裨將越盤湖隘攻南豐
城隨借閩募昌及其子名芳力戰遇害賊軍夜驚率喊李

總司來遂拔營回閩又督標把總周焜勦賊于寧州老樹
坑自辰至未血戰陣亡焜死在乙卯年

十四年乙卯春三月巴額二將軍帥師征廣信留夸蘭大駐防

賊謀知兵少數道來寇前鋒賊遇夸蘭大遊兵數十騎于
城東五里方接戰適有數騎自十一里北原馳下截出其
後賊腹背受敵遂大奔追至磨刀石居民亦奮白梃逐之
入河溺死者無算生擒十餘人方會訊于康王廟賊黨偽
副將葉某等自他道薄靈芝門綠堞而上叅將趙登舉署
道事同知范文英知府郭萬國俱遇害署鄱陽縣事縣丞
陸之蕃石門司巡檢翁鳳翥萬年知縣王萬鑑亦死亂兵
中五月將軍希爾根自省來援賊棄城遁復饒州程鳳退
歸德興後竟病死山中六月希將軍征浮梁遇賊陳虎于界牌鋪

斬殺甚衆宋啓運奔鉛山明年七月病死東鄉陳虎約降至七月

出復率兵圍之虎走匿深山九月偽將黃尚志復據餘干

自稱知縣事饒州事考

贛志云乙卯三月崖石賊擁衆攻雩都棧門不克而退又

掠大小禾溪及寧都之尖坑等處七月賊首黃斯勝等由

和平寇定南知縣林堪率鄉勇禦之

宜春志云三月棚賊焚擄油木棟一帶地方遣中軍遊擊

潘希聖進勦斬偽千總支勝吾殺賊二千有餘四月進勦

白水老巢殺賊千餘人

新昌志云正月桑將軍由上高恢復新昌仍以遊擊佟國

棟駐防六月國棟奉調九月賊衆大至守備史得勝失守

城陷十二月撫標中軍吳友名同遊擊林科帥衆恢復

十五年丙辰春正月耿逆偽將軍郭忠孝自九龍山率賊衆由

永豐至廣信水南一杯亭巴額二將軍出兵抵殺賊衆不

敢渡河三月二將軍奉調回省知府高夢說隨行七邑復

為賊踞八月康親王大兵由衢入閩十一月浙督李之芳

發官兵由玉山至廣信招撫各屬始復安堵廣信兵變志

饒州事考云三月守備莊名亮夜襲黃尚志營擒斬之五

月饒鎮都督高登科師入浮梁伏兵擒陳虎裂之以狗偽

都尉白顯忠偽將軍徐黃等知閩不可守擁衆出關至德

興焚掠最慘十一月夸蘭大胡某鎮標中軍陳其善率浮

梁營守備胡尊德從黃土嶺直搗西水諸賊望風款降

南康紀事云秋知府倫品卓奉檄勦賊破峽坪入吳田賊

敗走追二十里至赤石港遂逃入靖安山中賊收餘黨埋

伏大石坂復大敗之活擒偽官七員投誠偽兵部趙文止
 偽總兵戴汝濟大小偽官二百餘員偽兵八千餘名賊計
 窮詭言就撫盤踞江莊觀望十二月品卓率兵丁鄉勇往
 甘棠合勦從迴城進東莊焚賊巢七座抵七里長坑自已
 至申鏖戰賊潰敗墜崖死者數千礮傷箭射殺死五百有
 奇遂克江莊直抵福源龍安茭園等處餘賊遁回寧州
 贛志云耿逆偽將軍劉應麟自汀州出陷瑞金會昌贛鎮
 哲爾肯遣遊擊許盛領兵鎮雩都賊不敢逼四月進取會
 昌偵知珠蘭涼蓬灘賊伏大礮欲斷我兵來路盛于三更
 率勇健密趨賊營明晨水陸並進抵會昌西岸為營初十
 日雩都報急盛夜設虛營增竈分兵援雩都遇賊峽口敗
 之至程口江復偵知崖寇勾連閩逆萬餘駐水頭老虎坑
 意在攻取雩都盛至雩令所部登舟揚帆而下佯為贛州
 有急欲回策應者是夜潛師棄舟分兵三路直搗賊營斬
 級千餘又斬偽副將張進等四人賊潰散是歲滇逆將韓
 大任遣其黨邱興佑據萬安之浪川洞與崖石相聲援勢
 益張賊黨陳達先入寇安遠境攻劫長河五保偽提督馬
 某自平遠出攻屠長寧之城岡村偽總兵李善長王割耳
 環攻信豐擄掠甚慘又偽總兵徐命久李長青王百萬
 五月斬于大石保王龍光盧日葵徐飛鉤等眾數萬攻陷定南復
 攻下歷司守備夏期生統集營兵知縣林堪典史王總率
 鄉勇血戰斬王龍光等數百級賊乃遁

南安事攷云三月將軍舒恕莽吉兔等因粵藩從吳逆叛
 自粵回駐南安頓兵城外堵塞梅關四月山寇余賢何興

江西通志 卷三十一
復自仁化樂昌擁衆數萬由庾嶺刀背嶺分道而來僞總
兵王割耳攻破二塘牛頭等寨滿漢官兵勢不支遂與知
府張顯仁參將宣成功奔駐南康居民四散兩城皆空賊
帥分設官職秋粵來僞總管將軍嚴自明及僞將郭義等
率兵屯兩城遂余賢何興所置官屬惟留攝縣韓佳縉在
任是冬自明等出兵南康縣之古鎮鋪與我兵屢戰不利
奔回府城屯扎

萬年平亂始末云乙卯五月僞參將陳武魁勾引賊黨趙
和尚踞城邏捉民間子女勒銀取贖大軍至遁去復投入
僞將軍朱統錫營遂自稱都督帶兵數千駐蘇家橋恣行
荼毒十五年三月武魁率黨復陷城焚燬民居延及文廟
後投誠邀赦至壬戌十月斃于獄

宜春志云二月遣千總馬光英把總丁魁等恢復萍鄉斬
僞守備馬登雲李正良吳鍾等三月把總陳忠等于長坑
擒僞總兵揭玉卿及其弟文卿遣中軍遊擊李顯宗及防
萬遊擊陳素綸等會勦鐵山界巖前等處擒僞千總曇雲
追至沙溪湖塘城潭江殺賊千餘擒僞守備孔貴餘賊逃
往瀏陽醴陵四月棚賊復據萬載遣都司趙應時守備楊
朋實會同遊擊李顯宗恢復萬載守將關彪往茶村一帶
撲勦陣斬僞守備江文夾

萬安志云十五年楚寇陷吉郡復陷邑城營守鄧雄同副
將黃成章舟騎並進討平之
歙水志林云滇逆將韓大任之據吉安也興國村鄙抄劫
無寧宇興國僑寓居人藍子明獨奮先禦賊以少擊衆輒

勝于是白石蜜石竹管峒楓邊箬坑皆連結自保聚推子明為長嘗擊賊于迴龍嶂其子死焉子明戰愈力賊乃退明年十月大任拔營走閩降

十六年丁巳春三月饒鎮高登科恢復德興縣饒州事考

廣信志云二月大軍抵省知府高夢說復任不踰時又有

逆賊江拐子蘇百文盤踞上饒南鄉錢村日出剽掠

贛志云三月汀賊圍攻石城署縣事李德明率民兵拒守殺傷甚多賊宵遁

南安事考云三月嚴自明通款于我四月偽將軍郭義等皆遁自明出郊迎請舒莽二將軍駐扎信宿五月統兵入粵由是四邑復寧

宜春志云正月總兵趙應奎統領遊擊趙應時等馬步官

兵由金瑞進城守遊擊關彪都司汪國樑等領馬步兵由

白沙桐木進又遣守備胡文良等領兵由上栗寺碧溪前

進訂期夾勦白水株樹潭老山坑聚錢坑鐵山界蜈蚣巢

藍家巢葛坑南巖紅沙等處直搗黃茅孫家老巢陣斬

偽遊擊周良宇卜鳳奇偽都司張問達黃夫用歐陽勝楊

吉勝等賊巢盡行焚燬賊首朱永盛曾加甲等潰逃

新昌志云冬總督董衛國親提大兵征勦次芳塘諸將帥

師由黃岡口達銅鼓營直抵湖南平江界賊始蕩平

十七年戊午春三月提督趙賴移駐廣信與浙省兵會勦玉山

賊攻破老鼠洞八仙洞烏風洞渠魁何秉誠率眾歸順議

勦江機會賴調往攸縣賊復鳴張八月總督董衛國親臨

撲勦攻破錢村封禁山賊巢勢窮乞降偵得衛國有征楚

信遂匿不出既旋師江機楊一豹熊文生蘇百文張聞魁
呂貴陳輝羅有喜李日昇等結寨聚糧殺掠逾甚廣信兵
變志

饒州事考云十二月偽將陳璧乘德興無備突入城中明
年正月鎮標遊擊佟養正率江浙兵會勦擒之

袁州棚寇始末云戊午二月偽總兵朱永盛高玉澤曾加
印偽副將范君佐甘孕貞邱加職陳君啓等領偽兵萬餘
人親詣株樹潭投誠總督董衛國分散各標效用兵丁入
伍食糧願歸農者准回籍

十八年未提督許貞移鎮廣信調發官兵會同浙督標兵進
勦攻破八礮等處賊巢斬馘不計其數同上
贛志云十八年以尚之孝為宣義將軍勦崖石疇張治已

死治妻楊氏代領其眾有偽參軍黃煜者吉安人興國知
縣黃惟桂遣人以利害曉煜又單騎詣浪川洞招邱興佑
興佑楊氏俱至縣就撫惟朱明據險如故之孝兵駐寧都
六月抵崖石築長圍以困之贛總兵許盛知賊峙糧在乾
田寨引兵屠之七月賊饑窘就撫亂乃平屯將不從亂者
惟洪徵一人全家死焉

易學實平寇記云宣義大將軍以十八年六月十八日辛
巳師駐雩都都督李以江撫標兵至總兵許以南贛鎮兵
至吉則萬安龍泉永新贛則寧都瑞金會昌雩都興國之
防兵義勇先後雲集辛卯下令曰往者官兵進勦未至賊
穴而營久不見賊而還非師律也今出不意奪其阻薄其
窟賊可旦夕擒是夜師次長布壬辰駐虎坑癸巳直搗崖

石賊深溝重柵以抗我圍其東南西三面而北絕其水道
用謀言焚其乾田寨積糧丙申攻南寨壬寅破其北寨賊
窘懼乞降不許癸卯賊魁自縛伏轅門是役也遊擊將軍
張芳預幃幄新安鮑夔生實叅軍事身當矢礮督士卒先
登者中軍都督胡順左右遊擊何奔賈重俊及因壘就降
執訊分別良民子女還所親屬者贛軍司馬孫復也
安世鼎奏疏云興國三關三都等處招撫過僞總兵宋玉
衡張雄等泰和之浪川洞僞總兵劉廷黃玉趙龍俱就撫
又於鉛山等處招撫僞總兵鍾岳林起鳳湯繼茂等僞總
兵桂茂率領賊衆出山打糧經鎮臣蔡璋擒獲正法又有
呂貴蘇伯文因官兵進勦窮追貴逃閩地自殺伯文赴浙
投誠止有江機楊一豹二逆不即歸順會同提鎮諸臣征

勦

十九年

庚申

夏五月逆賊江機楊一豹相繼投撫江西全省餘

寇盡除

江右救寧疏略

右武事五卷白志廣撫博採可云備矣茲悉仍其舊云
伏念江西往事歷歷可徵我

朝統一區宇近閱百年

世祖章皇帝戡平僭偽大告武成

聖祖仁皇帝仁育義正久安長治自己未庚申以來三孽剷除

九圍式靖功德巍巍度越前古我

皇上以聖繼聖揆文奮武威德並行山居澤處白叟黃童目
不見金革之事耳不聞桴鼓之聲優游作息永享太平
之福生於斯時實為厚幸維

